

摘藻堂四庫全書薈要

集部

欽定四庫全書薈要

集部

御定歷代賦彙卷二十三

欽定四庫全書薈要卷一萬七千二百四十二

集部

御定歷代賦彙卷二十三

地理

石假山賦

元任士林

天地之間境足以移人人移之而飄忽物足以致人人

或可以致物此操蛇之神所以對愚公而聶飢也抱然
犀之餘焦覽具區於一目黯波臣之晝泣開水府之羣
玉媧煉之遺禹餘之劓隕而星芒結而水沫耽枯影之

申徒絜黃鉞之沈璧何其奇也爾則鐵繩千尋魚貫萬
夫水厭人而不悔鞭有石兮疾驅躡者踞者立者蹶者
銛者劇者獨者附者似鼻似口似蹄似股似蟠而蚪似
鬪而虎雲幻狀兮孤凝鳥停思兮欲翦神剡鬼削鬪面
呈趺出濠濮於華林納乾坤於一壺九華曉立五老前
揖跋賜履之登躋養瞳神於翠兀誰歟抱琴徒倚而吟
樂山之樂萬古此心草華未滋挹其仁也霞吞霧吐擘
其神也厚載靜容德我則也霏翠排青色我覲也真趣

已亡枯立堂堂子胡樂之以偽翼狂主人曰嘻不毛之
珍天不怪取終日之介置我丹府誓言不移容揖而去

石賦

陳
張正見

連山蔽虧巨石欽崎上興雲而蔚蒼下激水而推移舒
丹霞於九折混白露於三危鎮方城於濮水固天闕於
湯池開五嶽之靈圖集九老之僊都韜神弓於射的產
利劍於昆吾魚躍湘鄉之水鴈浮平固之湖墮山鵲之
金印碎驪龍之寶珠掩藹披衣氤氲翠微精衛取而填

海天孫用以支機隨西王而不落傍東武而俱飛

石賦

唐李邕

代有遠遊子植杖大野周目層巖覩巨石而歎曰茲盤
礴也可用武而轉乎茲峭峙也可騰趯而登乎觀其凌
雲插峰隱霄橫嶂峻削標表汗漫儀狀剗鎮地以周博
崛戴天而雄壯默玄雲之暮起艷丹霞之朝上若使矗
布長城巖聯高壁遏西戎而分塞截東胡而度磧張九
州之地險威四夷之天隔固可以眇絕驕子遐阻勅敵

歸華夏之甲士却邊荒之羽檄別有列在王庭地當文
砌疑貞琬之粉澤豔重錦之光麗承聽政之梁柱納進
賢之階陞匪徒夾植桃李因芳茝蕙降神女之徜徉拂
仙衣之容曳若乃苔蘚剝落雨露淋漓冰碧濤曜繪畫
紛披不邀代之所貴不欲人之見知罔懷金而則異曷
剖玉而方奇至若危堞孤援懸門禦衝出陣摧鶴乘城
起龍礮與矢而飛雨磁當途而列墉金鼓為之沮氣戈
矛為之輟鋒借如奕秋沉思蜀相興圖秉節制以全勝

縱劫殺以論都鄙宗緘之謬識嘉禹鑿之神模落五星
而多憎坐千人而不孤惟磨礱之所取任圓方之自殊
支空留於織室編尚想於兵符鳥何恨而填海山何言
而望夫徒以貞者不黷堅者可久卧如羊於山野蹲似
虎於林藪知作鼓之希聲信為人之無偶梁架海以東
注鎮臨江而南守庶投水而克成將補天而何有豈獨
砥礪利器盤踞真王鏃來肅慎門通越裳屹特立以興
主駕能言以發祥邇開蓮子表華遠倚劍子疏梁保茲

城而永固結彼交而不忘何止藏書入室勒篆離經翕
湘川之飛燕伏昆池之駭鯨膏久服而顏駐碑一觀而
涕零豈如扣角匡坐且悲歌於白水尋山小住止危途
於翠屏而已哉

古石賦

唐
鄭惟忠

博望侯周流天下歷覽山川尋長河於異域得美石而
獻焉漢武帝未之奇也東方朔見而喟然曰此石英輝
潤密秀色明爛舊枕昆吾之谿曾臨歸美之岸玉雉飛

而激矢金雞鳴而縱彈至如天台始裂地乳初分丹青
孕彩隱起成文盈尺則內含明月膚寸則外吐浮雲別
有兩楹分竦雙闕相向依依識啓母之形亭亭表望夫
之狀鼓迎桴而若動帆映舟而似颺此並流膏曲澗滴
髓危峯據谷成虎臨池作龍鋪英九節連葉千重若乃
泗水之上岐山之側撫之則磬動奇音被之則錦開新
色匠石見而驚駭師涓聞而歎息於是琢磨成狀雕瑩
生輝似龜則負圖盤峙如鵲則緘印騫飛在地者佳人

擣練登天者織女支機及其火烈崑墟星流宋國被隕
形碎遭焚影黑碑沉郢路之東柱折陽關之北昔之開
壇竹聳抱劒松抽礎應山雲之潤橋通海水之流柳谷
岸崩之馬鬱林泥落之牛莫不歲月彫訛丘陵蕪沒顛
陸坑穽枕倚巖窟據洞口而差戾出泉心而磳硤徒見
新排理圻舊感文迴圓分者電散方裂者冰開既藏瑕
而被蘚又抱穴以侵苔豈如寫鏡能明磨鋒可利擊拊
充帝庭之樂闋和覩王府之器總五色而補天含九光

而鎮地者矣辭未畢帝乃顧而言曰楚王見璞棄之山
阿不有卞氏其如玉何抽琴命操為古石之歌歌曰江
東藏瑞簡濟北蘊兵書若非平固湖中鴈定是昆明池
裏魚歌響既終神儀有懌左右驚視符彩傍射使玉人
而攻之果得連城之璧

禎石賦

以素質玄字篆
隸相參為韻

唐

薛存誠

上帝乃眷下顧豐我皇祚產禎石以報德約遠人以遐
赴外輝煥以發章內清明而含素方圓冰潔篆隸星布

五千符聖歷之長一九合太陽之數瑩然非追琢所及
忽爾若神靈來附考乎文也知諸受命之期徵乎石焉
示此維城之固且夫文旌乎寶石堅乎質垂本根以繁
茂作元后之貞吉驗符而天命有歸貽慶而孫謀莫失
方洛書以自來狀河圖以負出懿夫皦彩發鮮隱起成
妍質非工斲字乃神鐫移篆文於玉璽之上取隸則於
銅棺之前紛鳥迹以屈漢若飛騰而在泉帝拜昌言慶
實延于卜代名傳聖運功何異於補天苟不思而來暨

恭承眷于上玄信乎瑞以勤致彰乎天賜其為后也貴乎無得而稱其為石也下乃不求而致豈比夫渭濱之璜兮空言佐命峴首之碑兮永沉文字孰若我垂吉祚於當時演昌期於後嗣且夫文可嘉而不可卷石可固而不可轉題八角而爾乃增輝刻九言而吾斯盡善宜子孫之蟄蟄得先銜於隸篆太宗勞謙垂制虔告上帝伊連被而莫紀自高祖而流裔其石也為遐玉之祥惟孤也實先君之系誠降慶之所致敢欺紿於輿隸於是

公卿列辟劔佩鏘鏘聯趨詣石載拜稱觴斯萬人之有
慶表二聖之重光不然何炫發於石玉侔其相瑩煌無
點璀璨有章帝曰祖考之德惟臯股肱之能以參故天
錫之罔替諒不穀而何堪

瑞石賦

有序

明 潘 桂

天啓丁卯京口載罹凶荒天青地孽割我稼穡萬姓磬
罄無所寄命圖山之陰天產石粉其色白錯者紅其味
甘其質膩咀之馨其液可搏不礲餒者充饑者塞厄者

鼓而立山去城百里而近余興而觀之擔者溢阡采者
闕于丘陟間趾可拘也嗟夫天地之大奇出不窮理無
而事臻氣鼓而物奪自非覩記之餘千載之後安知不
與補天之事同疑其悠謬哉賦曰

天符臻地寶植嵒巖闢坤珍出補天佐嶽錫爾靈石爾
其為質也靡瓊委玉凝肪截脂鮮飛豔雪華曜朝曦光
逾雲母色麗瑤芝釋之叟叟勑之靡靡無餒無敗不礪
不礪埒華山之玉屑方梁父之銀泥豈石廩之宛在抑

地乳之潛滋宜充虛而解戰爰塞餒而救饑繫生民之
百需兮食為之天天以六氣下凝兮成五味之華鮮麗
五行於百穀兮固物始而民先勛水耕而火耨兮竭胼
胝以祈年羌穗岐而表瑞兮抑雨粟而徵賢曷埒此自
然之食兮協幽贊於重玄况凶年之屢稼兮悲地財之
貧破何辜今之人兮罄天地而一餓閔鼠空而穀盡兮
氣廉廉而消墮冢累累以魂新兮或流離而遷摠邁珍
符之大垂兮感神貺之潛呈噓枯以續喘兮拔瘁而為

榮黃吻怡而含哺兮鮐背鼓舞而取盈走遐邇以如驚
兮咸廢耘以輟耕筐承而車任兮徑隘而衢爭惠遺黎
非小補兮嗣嘉穀於秋成夫孰賁此靈休兮匪天工其
奚及夫既秉好生之恒德兮曷不祐此垂成之粒割之
糈而錫之餐兮夫孰不歌夫帝力固造物之多奇兮幻
生成而不測系曰石為氣核堅不可奪兮氣之所鼓性
為之脫兮含功收生地之奇祿兮畫地為餅庶幾果腹
兮

石鏡賦

以清光內朗稟之媚然為韻

唐李程

惟石之貞惟鏡之清鏡因石以為異石假鏡而為名其在石焉肇自一拳之質其為鏡也非因百鍊之精不資磨瑩而冰淨詎假雕鐫而砥平徒美夫孕清瑩含彩綴粲玉質以皎晶蓄霜華而明媚匪因人力其成也何時倬彼神功其來也奚自凝輝炯炯散彩洋洋既不勞乎鎔範亦無失於圓方輝映空巖恒舞山雞之影色澄清夜寧慙玉兔之光伊鑒物之必審信自然之所稟彼虛

受而不遺同至道之無私既不限於遐邇豈有差於毫釐深山之中誰辨藏冰之處幽谷之際寧分抵壁之時況剛直其體清貞自持恒發輝山之色常含韞玉之姿懷寧一之心不可轉也處闐寂之地誰其尸之當六合之清爽澄素輝之潔朗可以坐致於雲霄可以立分於魍魎知遠之邇視山岳之在目以小觀大覽江湖如指掌且鏡之為物也淨石之為義也堅既守質以固矣亦騰光而皓然朗鑒之前皆願呈其肝膽委照之下終願

辨乎媼妍故能無微不燭無物不載彼三光與萬類莫不形乎其內也哉

落星石賦

唐崔沔

元氣初變有形既闢稟清明之表者騰為星辰受重濁之資者降為土石肇經綸於邃古蓋常久而不易詭哉靈物爰始混成叅夫玄象麗於太清彼在天也何譴奄淪落於邊城其在地也何幸復推遷於上京爾其蘭臺廣廡芸閣修除飛軒廊落邃宇崇虛芳草旖旎珍木扶

疎邇九重之宮闕藏萬古之圖書地禁務簡政和禮舒
貞而不黷其清有餘意棲閒之得所形變化其焉如徒
觀其隱淪晶昭蓄縮光芒體硨磲以難動氣埋冥而不
揚擬於規矩既不合於圓方徵其彩飾又無復於玄黃
匪處匪出不識於行藏匪榮匪悴不達於炎涼夫其靜
也何必徐生百祥夫其重也何必能鎮百殃庶永終而
知弊蓋抱璞而襲常彼無用也亦至人之所謂允臧

昆明池石鯨賦

唐
李子卿

漢武帝將恢厥功闢厥土使近必伏遠必取乃象滇河
以為池法昆明而教武於是水物備石鯨吐茸鱗鏤甲
欲動於漣漪掉尾連鬣必隨於風雨殘文沙白古色苔
蒼若噴沫而生浪狀銜珠而有光質惟其堅豈有時而
泐感則斯應蓋動惟其常方將協靈德薦禎祥豈泥沉
而沙卧與地久而天長者哉至若漢苑風霽秦渚流春
輕搖澹泞稍動淵淪載沉載浮百尺且窺於頌首若明
若滅兩崖猶認於文鱗對牛女而光動映樓船而色新

誇大豈慙於海客遇屯空笑於波臣及乎雷隱南山雲

生北斗鼓怒波擊崩騰水走勢則洶洶有類陽侯之振

聲乃競競宛是蒲牢之吼若此則非不知靈之所憑神

之所有者也且石之為質也磨而不磷魚之為物也動

而必順豈比夫為犀蜀郡浦際空沉作燕湘川雨中方

振色映乎崖渚性合乎風雷非任子之釣得儻琴高之

御來幸見處於河漢亦何辭於劫灰客有感而言曰今

失流無虞鏗鐘何託請為不轉之志以就觀濠之樂儻

南溟之可圖吾固知夫後時之可以潛躍也

魚龍石賦

以一川中石無不似之為韻

唐王棨

隴山下沂水中有石類魚龍之狀成形匪追琢之功半
隱齋淪若噉喁而斯在餘依磧礫將蟠蟄以攸同嘉夫
地出貞姿天成詭質雖駉駉之勢可類而跳獸之規莫
匹厥象有二其堅惟一水清見處如欣得水之秋雲起
觸時稍叶召雲之日豈非自從凝結有此規模既異織
女還非望夫或似罷江湖之游泳又如收雲雨之虛無

徒使漁人川上而幾迴顧盼仍令秦氏路旁而終日踟
躕蓋以磊磊漸分磷磷酷似溜穿而吮沫無別苔駁而
成章可擬曾經飲羽若銜索以斯存或用紀功疑負圖
而載止由是密聚鱗次孤標介然設賴尾於五色認胡
髯于一攀初驚獺祭於地復謂見化於川覩岸草以旁
生不殊在藻遇春流而乍沒又若潛淵既將轉以揚鬚
亦因泐而無首比岫居而苟可於泥蟠兮曷不中猶蘊
玉尚含呂望之璜誰取支機已在葉公之牖造化難知

雕鐫者誰何莓苔之古色有鱗鬣之奇姿謂湘水之燕
且殊寧俟飛也與金華之羊自別何勞叱之既表玄功
永存靈蹟映一水之晴綠對羣峰之暮碧彼結網垂綸
之士與攀髯採珠之客或命駕而西遊試迴眸於此石

仙石靈臺賦

唐 闕名

惟神化之所感何禎祥而必臻位將天而同德天與日
而共新百靈扶於三善萬象資乎一人美以英聲遠被
嘉貺必陳於是秘其迹則如畫如隱圖其文則匪鐫匪

刻屈若絲縈舒同髮直彩非因染辭無假飾雖真錄之
可觀固神功之靡測若乃烟消字發苔落文生映月波
起含日金明彰八千之縣祚著三代之珍名或鸞迴而
鳳轉乍雲點而霜橫法兼篆籀體被形聲信天筆之攸
假實神翰之所成至如桂影宵臨星光夜燭分若珠解
連同瓊續映朝霞以散錦流夕露以垂玉紀三皇之故
事包五代之遺躅足使濁河龍泳清洛龜沈既超前而
冠後亦挾古而光今所以管絃流韻鐘石凝音豈獨妙

符至理固亦道叶乾心總羣瑞以考徵實表盛乎貞紀
騰茂實於千載激清流乎萬祀玄象煥以呈祥靈山鬱
以效祉明皇基之永固與天地乎終始嗟微臣之菲薄
屬欽明於暮齒望天闕以長謠情願戀其何已也

溜穿石賦

以能以甚柔而
攻至堅為韻

唐趙蕃

山溜泠然漱幽石而濺濺恒羃歷以迸集忽嵌空而下
穿介若自持謂稟靈而利物呀而中斷見積小以摧堅
且其輕重異源剛柔殊類嘉洞出而無朕知累功而有

自貫白雲之幽抱滴滴方來破蒼苔之古痕泠泠斯至
崎嶇莫狀激射無窮逗跳沫以居內洩涓流而在中日
就月將必漸然而爭赴因微方著殊易者之先攻原乎
厥性既柔其平如砥因滴瀝以成象若洞澈而虛已注
而匪竭歎追琢之莫加協乃有時顧堅貞而何以下漱
而玉中間似冰謂雕以為樽窪而無當疑鑿而成磴豁
爾非憑然則引深邃洞觚稜諒在物而靡及非自微而
不能由是異類相推於斯何甚蒙兮莫奪堅然自稟清

光亂灑初熠熠以穿菱素彩頻垂每熒熒而透錦偉夫
炯若方絜於焉注茲或零落以將盡竟連環而不遺依
依未通遵神泉之靡息一一將徹聽鳴玉之遠而故可
以託質悠悠於山之幽載吐潛液靜如冥搜滴盤礴之
間通茲餘潤挺剛克之際分乎至柔諒成功之不遠庶
積習之可求

溜穿石賦

以能以甚柔而
攻至堅為韻

唐
楊弘貞

溜可穿石柔能陷堅因依而上下相遇悠久而貞剛失

全始則泠泠觸泓澄而或躍既而決決宵洞達而旁穿
一道中透孤光下懸何載馳之不息終漸靡之使然觀
夫習坎能通柔虛漸至虹挂空而飲井星曳練而投地
徵老聃之說柔弱勝於剛強驗夫子之文積善由乎馴
致當其涓涓無已皓皓未通若蘄巖之見拒能激射以
相攻既漱盪以探奧遂深沉而鑿空下漱花浮似出桃
源之外乘流魚躍如辭丙穴之中言念其美因詳所以
石雖堅而有崖溜雖柔而不止進寸退尺常一以貫之

日往月來則就其深矣克諧潤下之道實契靈長之理
想夫經始之時人莫知之笑我者謂量力而徒爾見機
者料成功之遠而既知難而不退長引彼而注茲是能
卒獲其求何傷守柔細滴瀝以成響大逶迤而若抽在
彼一拳同玉卮之無當經乎五色狀銀漢之分流其空
可翫其義可稟庶求福之不回思進身而去甚彼以水
投石于嗟莫承摧鋒飲羽誰謂難能曷若挫銳而功著
積微而道弘妙哉斯賦之旨惟執柔而有恒

望夫化為石賦

以望遠思深質
隨神變為韻

唐

白行簡

至堅者石最靈者人何精誠之所感忽變化而如神離
思無窮已極傷春之目貞心彌固俄成可轉之身原夫
念遠增懷憑高流盼心搖搖而有待目眇眇而不見絲
蘿無託難立節以自持金石比堅故推誠而遂變徒觀
夫其形未泐其怨則深介然而凝類夫啓母之狀確乎
不拔堅於王霸之心口也不言腹今則實形落落以孤
立勢亭亭而迴出化輕褻於五色獨認羅衣變纖手於

一拳已迷紈質矧乎石以表其貞變以彰其異結千里
之怨望含萬里之幽思綠雲朝觸拂戔戔之髻鬟微雨
暮霏灑漣漣之珠淚雜霜華於臉粉脫苔點於眉翠昔
居人代雖云賦命在天今化山椒可謂成形於地於是
感其事察其宜採靡蕪之芳生不相見化芙蓉之質死
不相隨冀同穴於冥漠成終天之別離則知行高者其
感深跡異者其致遠委碧峰之窈窕辭紅樓之婉婉下
山有路初期攜手同歸窺戶無人終歎往而不返嗟乎

貞志可嘉高節惟亮同胚渾之凝結異追琢而成狀孤
烟不散若襲香於爐峰之前圓月斜臨似對鏡於廬山
之上形委化而已久目凝睇而猶望悲夫思婦與行人
莫不覩之而惆悵

望夫石賦

明 錢文薦

石乃堅確人則虛靈何凝眸而注戀忽變質而呈形原
夫念遠興思登高引睇漆膠愛結絲蘿恩締別去經年
憂來積歲徒託夢想難忘盟誓心惻惻以抱嗟目盈盈

其垂泪恐枕衾之便歇悲日月之將逝遂乃杳然無知
介乎不轉獨含硤砢誰覩婉孌心怨難磨眉顰莫展傷
彼委蛻令人涕泣徒觀其幻身雖化愁意猶存袖翻竹
色韞點苔痕勢亭亭而不墜形落落以無援積千年之
離緒消萬里之遊魂則知望絕倚閭歡辭舉案攜手靡
及捧心徒亂窺蜀鏡而輝掩指爐峰而香斷結離腸於
九層葬蓮嶽於千瓣於是豎芳標傳苦節謝雲雨凌霜
雪清風播以無窮皎月映而不減留孤影兮異代結相

思兮同穴可憐哉石雖粗厲情本綢繆款樹聲應遭鞭
血流遇嘯歌而動魄聞佛法而點頭儻雙星之復照當
五色之仍浮斂恨每孤立懷貞空延佇但教東海可揚
塵神化何知不美女

石姥賦

宋文同

上簷崙之飛泉兮披蒼翳之榛莽肝倦虺而膺喘兮窮
其巔於絕咀爰有石而跂跂兮旁無他而相伍色黝黝
而骨勁劣兮具支節而帶文縷其遠睨之若人兮迫猶

疑其蹲虎里俗神而甚恭兮號相尊其曰姥謂遽亟而
丐貺兮緣其求而下予忽旱陽赫而上爇兮飛光流而
燎土燁多稼以巨甌兮烹羣命於碩黼走羣靈而莫荅
兮後率歸而此慙役稚耄而竭慶兮來號呶而詔誨會
諸力以掀揭兮使轉移其常處靈歟然而見景怪兮衆
外愕而中怖滄堀堞而下發兮鬱黯靄而上布懔砰磕
而中作兮漭滂沱而四注回極熾而施大潤兮曾不暇
乎旋步已復還其故立兮各再拜而引去問其端而何

從今年皆失其幾許吾聞懷澤之與符陽兮亦有石為
牛鼓彼民釁而擊之兮常以旱而取雨宛其於爾為類
兮彼又載於國譜噫惟皇之大職兮繫陰陽之煦嫗奚
磊砢之頑質兮輒矯權而自主事豈無於適然兮而惑
者槩從而為語皇忽寤而震恚兮列罪目而爾數訶星
士以施梃兮敕雷將而揮斧赫電火而灰爾兮鼓箕風
而蕩汝闐大空而泮散兮一磨剋其處所俾愚黎之偪
正兮識惟皇之覆露皇未寤而民尚惑兮徒吾髀之長

拊

太湖石賦

有序

宋陳洙

客有嗜太湖石者圖其形示余命為賦其辭曰

江之東直走數百里有太湖兮澄其清湖之浪相擊幾
千年有頑石兮醜其形徒觀夫風撼根折波流勢橫神
助爾怪天分爾英駭立驚犀低開畫屏素烟散而復聚
蒼苔死兮又生譬夫枯槎浮天黑龍飲水鬼蹲無狀雲
飛乍起稚戲攜手獸眠盤尾大若防風之骨竅如比干

之心蜜房萬穿秋山半尋子都之戟前其鍛韓稜之劍
利於鑄若乃湖水無邊胡天一色露氣曉蒸蟾津夜滴
伊爾堅姿峭兮寒碧千怪萬狀羌難得而剖悉我將弔
范蠡於澤畔問伍員於波際原君厥初何緣而異公侯
求之如張華之求珠衆人獻之如卞和之獻玉植於庭
囿視之不足噫爾形擁腫兮難琢明堂之礎爾形中虛
兮難刻鴻都之經用汝作礪兮汝頑厥姿攻汝為磬兮
汝濁其聲亡所用之而時人是寶余獨掩口盧胡而笑

子之醜

採石賦

有序

宋程俱

建中靖國元年以修奉景靈西室下吳興吳郡採太湖石四千六百枚而吳郡實採於包山某獲目此瑰奇之產謹為賦云

吳吏採石於包山也洞庭鄉三老趨而進揖而言曰惟古渾渾物全其天金藏於穴珠安於淵機械既發剖蚌推礦不翼而飛無脛而騁剗山探海階世之競迺若富

媼贅瘤則為山嶽茂草木於毛膚包嶄巖於骨骼與瓦
甃其無間何於焉而是索今使者窺複穴蕩沈沙搜奇
礪於洞脚劖巧勢於丘阿呼靈匠以運斤指陽侯使息
波豎江山之萼萼續劒閣之峩峩莫不剔山骨拔雲根
貞女屹立伏虎晝奔督郵攘袂以相睨令史臨江而抗
尊雖不遭於醢沃豈有恨於苔痕嗟主人之不見似羊
牧之猶存何一拳之足取笑九仞之徒勤既而山戶蛾
集篤師雲屯輸萬金之重載走千里於通津使山以為

骨則土將圯使玉以為璞則山將貧煮糧之容歎絕年
之無飽談玄之老持一法其誰論嘗聞不為無益則用
之所以足惟土物愛則民之所以淳怪斯取之安用非
野夫之樂聞敢請使者吏呼而語曰醯雞不可與語天
蟪蛄不可與論年矧齊侯之讀書豈輪人之得言三老
曰極治之世樵夫笑不談王道至聖之門鄙夫問而竭
兩端野人固願知之對曰上德光大孝通神明闡原廟
之制安在天之靈以謂物不盛則禮不備意不盡則享

不精故金瑰琛珮天不祕其寶樟楠梗梓地不愛其生而青州之怪猶未足於充庭故於此乎取之且鑿太行之石英採穀城之文石以起景陽於芳林者魏明之侈陋也菲衣惡食卑宮室以致美乎祭祀者夏禹之勤儉也上方戒後苑之作緩文思之程示敦樸以正始盡情文而事神此固上德之難名者矣抑嘗聞之西有未平之羌北有久驕之虜顧喋血之未艾乍遊魂而送死方將不頓一戈不馳一羽殄醜類於烟埃瞰幽荒於掌股

庶黃石之斯在儻素書之可遇抑又聞之三德雖修不
遺指佞之草萬國雖和猶豢觸邪之獸蓋邪佞之蠱心
猶膏肓之自腠雖屬鏤之無知顧尚方之奚裒故將鑄
采石以為劒凜豎毛於佞首若是則在邊無汗馬之勞
在庭無履霜之咎也抑又聞之堯不能無九年之災湯
不能無七年之旱雖陰陽之或乖豈閑縱之可緩故將
放鞭石於宜都回雨暘於咳眊抑又聞之扶耒之子有
土不毛抱甕之老有茅不蔕富者侈而貧者惰遊者逸

而居者勞雖齊導之有素奈狡兔而是逃故將取嘉石
以列坐平罷民於外郊抑又聞之日不蔽則明川不闕
則清聽之廣者視必遠基之固者室不傾方披旒而出
黠俾伐鼓而揚旌蓋蕭牆之戒坐遠於千里朽索之馭
益危於薄冰矧四者之無告尤聖人之所矜故將盡九
山之赤石達萬寓之窮民三老悚然而興曰聖化蓋至
此乎吏曰此猶未也若其造化掌中宇宙胸次彌綸兩
儀而執天衡變理二氣而襲氣母此庖犧之婦所以引

日星之鉞縷方將鍊五色以補天育萬生於一府既無
謝於襄城之師又何驚於藐姑之處吾亦與汝飲陰陽
之和而遊萬物之祖矣又何帝力之知哉三老稽首再
拜曰鄙樸之人鹿豕其遊聾瞽其知竊臆妄議乃命知
之

凝雲石賦

元 袁 桷

文登之宮積濤成雪天風盪摩海氣幻滅欽崙蜿蜒堅
若金鐵大者成壑小者成穴蜂房羣綴蟻曲百結爰有

張子挾竒發珍藉以文錦炷以古薰陋博山之侈靡髣
爐峯之氤氲湛然塵消號為凝雲有客哆而笑曰南山
朝隤蒼蔚無垠太素為母五嶽為賓舍虛成形積潤以
神今子友一卷於几席雲何自而凝哉張子倚梧而言
曰窘尋丈者不能以喻大語荒忽者適足以資怪人惟
至靈品物是賴明而通之呼吸萬籟決為奔騰興為靈
霸其來無趾其去莫閼惟古至人韞玉以匱藏明於幽
養神於獨內澄外觀嗒若槁木靜以自儀無喪無辱念

此石友其德不瀆燕居相忘庸以薰沐則夫所謂凝雲者不待於外而自足也容喜而笑遂為之賦

試劒石賦

有序

明王寵

石在虎丘道傍云吳王鑄劒成而試之或云秦始皇掘得吳殉劒而試之茲兩存其義云

赤堇之精邪溪之英伉儷翦爪百鍊始成太陽五金寄氣託靈龜文縵理價重連城其鏐瑩冰其鋒凝霜脊挾霆威鐔流電光嶺烏揚輝慧難刷芒斂以鷄膏磨以粵

斫走蚘蟊於娑竭飛天驕於旋冥十步去一人千里不
留行惟時皆順理之事當晦其迹而國有逆理之謀則
見其形故無道則去有道則呈也就爾長一國者用之
盍刑長頸之宿讐可刳佞舌之宰嚭夫何反賜乎忠臣
是倒持而莫知所以乃自絕夫至德之開國致伯業之
就圯俾若君天下者得之宜斬臂鷹之禁術當誅指鹿
之闖豎夫何反加乎令子是逆施以亂人之紀乃自傾
百二之山河致鮑腥之不已妄肆一時之暴空遺萬年

之恥於乎青天可倚白雲可挾雖有利器兮那克任其
剛烈博浪之挫未明靈姑之辱莫雪彼磐陀有何辜兮
徑劈之齊裂徒裝駕乎猛鷲曾未翦除乎妖孽想當時
破業薛震勾剗號罔兩於巖扃飛火電之列缺駭海山
之巨靈迸丹丘之鬼血故於歷世之千祀猶存雲根之
兩截蝕苔蘚之青蒼示隱磷之瞥屑使後人之來觀訝
靈蹤之未滅顧世事之若茲爰長歎而欲咽

土賦

唐

呂太一

一闔一闢分陽分陰坎為水兮離為火東方木兮西方
金惟土德之為大處中位而君臨寒暑不能易其節鬼
神無以測其深吐納清濁區分寓縣帝軒感氣於星斗
虞舜降精於雷電爾其荆河墳壤淮海塗泥草木漸包
於赤埴璆鐵作貢於青藜火以炎上為母水以潤下為
妻黃白分於雍冀官位列於東西蒸之以為城闕北連
朔野累之以為臺觀上構虹霓為海為河為牛為馬起
圓規於陣法美教化於王者負之為模胡人失其膽氣

得之為祥晉卿載於原野且久且大非名可名定剛柔
於坤德合絲竹於宮聲夫其為重也封割五色分茅錫
社夫其為厚也包括萬象含姿育靈處瘠則勞處沃則
逸白獸忽見籟羊間出體均物而為象抱溫柔以成質
舟航纔盡則青縷飛神六五既臨則黃裳元吉萬國收
其利三公主其秩因覆簣而成山為幽居而鑿室不借
譽於龍鳳直養德於麒麟失之則昆蟲作孽得之則宗
族以親雖鼇足初分重濁者為之地而羊角勃起輕清

者為之塵授之可薦於宗廟捧之未塞於孟津起刑馬而為首祀勾龍以為神漢廟玉環方之則君王納諫豐城寶劒拭之則光彩射人含物吐象包藏玉石均王四時卑陞三尺運乎虛舟之中不以為損捧乎泰山之上不以為益土之為德也重土之為性也平爰稼穡而為務被朱紫而為榮余以既藉形體承恩天壤公和之山窟非陋子猷之冬林自賞先君列國猶未斷於封疆軒佐吹塵直庶幾於夢相

土賦

以中方正色繁
育生類為韻

唐

韋 岫

質付坤元形分地類有持帶山川之力有長養稼穡之
利結為大塊中含萬物之根充被方輿外定九州之位
於是黃帝后土怒而交爭曰天有兩曜日為最明地有
五行土為至精人無我而不立子無我而不成故禮得
之而以壇以墀君得之而以社以城子言各執其一端
子智不出乎四生向者夸競交肩紛紜未息殊不知皆
在五土何自德色木之始叢榮本茂葉秀枝繁不依於

土何因託根火之重赫奕華夏照耀乾坤無吾為土雖
猛不存金生於山山吾所育水出於地地吾之族若藏
礦朴於峰巒化江湖於原陸子何有哉吾為五方之主
為萬聖之雄造邦本立大中布而為金木水火分而為
南北西東使百王之傳授若四氣之始終皆德非博厚
故號不統同國家保大定功體元立正法土德受天命
陵無一抔之盜貢有五色之盛合為應鼓擊六氣以還
淳累作春臺熙萬人之遂性子盍鳩合異類率賓殊方

歸有極贊無疆帝乃約束遠近神乃糾合要荒咸鞠躬
離位厥角來王自是盡四夷之君長皆朝我唐

五色土賦

以皇子畢封依
色建社為韻

唐

崔損

至哉土德光含五色其色也辨五方以建侯其德也發
萬物以生植自夏禹而作貢在徐方而是職王者立社
以封疆諸侯苴茅而有國於赫巨唐德之皇皇實乘土
而化康采大漢強幹之宜裂地以爵法有周維城之制
分土而王各班其位各正其方用甲日而靡忒建陰氣

而允臧定五方而式序分五色而有章平野烟消發卿
雲之瑞彩高天雨霽浮麗日之重光衆色環封所以示
外其其方職正色居上所以表內附於中黃觀其儀則
知大君之有弼稽其旨則知邦伯之有秩列三才則惟
數在五叅十端則惟德居一既明既麗可以比乎天文
不騫不崩所以保乎陰騭配皇王之永久齊天地而終
畢矧夫經邦理社必土是封光昭聖德叶贊時雍將尊
天以親地在侯土與國社既蕃翰乎四海實底寧乎天

下若然者君立社以布政臣受土而宣威象君臣之同
理知社土之相依是以成百王之則作萬邦之憲珪璋
玉帛莫不因我而執公侯伯子莫不因我而建土之德
也斯美社之義也奚擬其色也匪同五星而乍連乍散
其質也各表一方而嶽立山峙有以崇國祚於我皇有
以同盤石於宗子夫如是則其義廣矣豈斯文之所能
盡紀

五色土賦

以皇子畢封依
色建社為韻

唐
盧士開

尊彼國常乃立人極依大社以封土命諸侯以方色木
官復位東極於焉必書火正是司南方由之可識西同
白帝之象北察玄武之職配中黃而立名覆四方而作
式於是端宸穆穆授策皇皇賢戚封建君臣樂康既載
人之爾厚亦植物而惟良可以載八紘包大荒豈離邊
於爾邑盡東南於我疆昔神黷無厭聞草故於有魏天
祚明德遂惟新於聖唐總祝融與蓐收臣玄冥與勾芒
知合之以濟代故貢之以來王守於爾位亦有寵子思

翦桐而是立故分茅以共理所以維城所以撫封爰作
稼穡錫之附庸列五色以相備和八音以相從色能惟
正音乃叶雅將察之以報功故封之以立社惟人是恤
選賢以建仰夏王之攸敷法周官之大憲胙之而氏可
命相之而宅可依五德聿修萬方知歸即之也真彩煌
煌望之也靈壇巍巍足以表正方夏發揚德輝等乎珪
瑞叶以元吉建樹侯家藩屏王室分之惟五行之惟一
實邦家之永固與天壤而齊畢

黃賦

以平上去入為韻

唐

張階

堪輿之內羣象茫茫均四時之辨物列五色以居方名
可大者其惟中黃吹律成音考定宮商之韻麗天為則
遙分日月之光石在穀城之下氣流華闕之傍雲瑞命
官而共治星見知芒之莫當恒發揮於煜煜寧見混於
蒼蒼黃之為用時義大矣揣稱之功請言其始土德載
物首更王之五行河水流謙恒曲成於千里鶴拂羽於
太液龍弄鱗於成紀悲哉秋之為氣歲將暮止菊花可

折凝曉露而含光木葉既零拂涼風而亂起夫惟色有
其變用無不遍染素絲之正色映飛塵而不見含氛昏
而暫隱向晴曠而復見漢霧塞而呈災秦蛇夢而命奠
乃有號國窮士非聖不述務本於三學道於一雖觀色
而託賦猶守中而靡失希執念而見升願啓心而就日

土風賦

有序

唐
闕名

班固曰人含五常貴於萬彙剛柔緩急音聲不同繫水
土之風氣則謂之風其好惡取舍動靜不恒隨君上之

情欲聖唐四三皇而六五帝一六合而光宅覽職方圖
山川盡見歲七月木鐸徇於路命州里舉賢良於我睢
陽古之大郡也唯君子能通天下之志也其辭曰

吳季札挺生江國自南徂北聽羣樂之存亡觀諸夏之
臧惡乃言夫大雅小雅周南召南陳俗夸而奢其國無
主韓地薄而險其人不堪燕都渤海秦負汧隴俠客憑
陵世家淫勇顓頊之居衛也桑間濮上務耽聲色太公
之存齊也冠帶衣履唯勤組織洙泗之間既富財力腎

畢之下彌重獵弋冀州則紂之餘烈易為讐寇合浦則
蠻之獷俗相尚戰鬪吳南有豫章之基燒銅山而煮鹽
海楚東有雲夢之區鞭火耕而驅水耨豈若睢陽城臨
氏房其地平促其人溫良昔者舜漁雷澤堯作平陽天
乙都亳沛公潛梁故地多君子而風有先王富禮樂盛
文章魚鹽委積士馬精強亦有顏色野人居宋而生孔
子漆園傲吏隱周而號蒙莊韋氏以占星著族楚宮以
揆日居方宓子賤聽訟築臺坐空囹圄巫馬期勸農作

宰克正封疆亦有高辛故郡下邑軍塲蔡走定陶之國
晉入沙隨之鄉與夷出盟於瓦屋郤缺來會於承匡聊
采綴而為賦叙菁華而未央言其國之始祖微子封於
斯土先膺宗周之錫命招納暴殷之餘戶宅陶唐火正
之監就彭城鐵官之估於是孟諸為澤芒山為圃日尋
干戈雲列羣伍起臺十仞作室百堵按弓甲飛樓櫓橫
鈞臺伐金鼓討曹滅衛侵鄆掠魯會盟於鴻口之亭繳
射於龍遊之浦及其楚國圍急澤門役苦外則盱眙而

歌內則析骸而哺妖星去國所移者三怪石隕空視之
則五其後漢分元弟出食於梁文帝則錫茅而建社景
帝則肅桂而稱觴由是彩艇畫樓鋪鴈池以千里蘭軒
竹閣澄猿巖而四起徵廐馬於邊徼選宮人於街市千
乘出車百金練士煌煌煒煒而軍容備矣南面稱霸而
朝天子若乃秦名礪郡禹作豫州城池競於春色車騎
溢於川流惠連則詠南山以作賦長卿則背西蜀而來
遊入瓜亭而避暑臨穀塾而迎秋弔仙人於蒙邑祠閼

伯於商丘想華門之瘳狗歎梁野之妖牛並忘歸於此
地充近侍而淹留別有忠臣壯士貞夫孝子五侯競立
三王俱死英靈遽見商摧未已雖埋骨於黃塵俱列名
於青史當今奄有萬國承平百年化被則如春露之沾
草文同則若夜星之拱天惟茲都之宏壯比列土而居
先屬城有師何代無賢伊昔全盛莫之與競食客駢闐
諸侯聘命旌旆互出臺殿交映忽瓜剖而豆分若烟收
而雨竟已矣哉中則傾兮滿則缺陰靈起兮陽精滅始

看春樹歇芳菲已見秋源漲沙雪自昔雄材與壯氣莫
不埋恨而吞吐七十里之城郭仍在一千年之綺羅都
絕京兆杜公久遊關東臨少昊之秋月過梁王之舊宮
食水土問人風執官曹而正直抱身鏡而清通識寶者
不遺於草澤懷材者喜遇於良工但能任土而作貢則
我梁國之不空

泥賦

有序

唐
鄭惟忠

語曰等級懸隔有似雲泥然雲高則高矣如其不義猶

為夫子所輕故曰於我如浮雲泥卑則卑矣苟不可棄
且見莊生所重故曰曳尾於塗中吾少也嘗覽左太冲
詩曰賤者雖自賤重之若干鈞感斯言之有徵故為泥
賦

嘉洪鑪之造化物無象而不甄惟茲泥之為質諒稟之
於自然雖體潤性柔而名卑質賤不同塵以苟出必感
澤而斯見信厚地之所生匪膏雨而不變同賢良之韞
匱候聖明而方薦若乃花水行落莢雨將餘交衢蓄潦

曲浦含汙望之疑實即之也虛動而為有靜而為無苟
具形之所躋必觸類而圖諸託龜文而成印寫鳥跡以
為書蹤發追風之馬轍閉流水之車於是陶鈞賦象刻
削成器固應用之無方任良工之所肆順規矩而畫一
循制度而無二裁無不成擬無不類以土為質以水為
位位去質沈復歸乎地彼木偶之漂泊萍流之自恣推
移兮莫識其始終汎濫兮莫知其所至若乃蘊彫草於
閒館含芳樹於禁闈不緇白玉之彩徒混明珠之輝帶

晴牛而暫落逐春燕而還飛何茲物之無識亦應命以
知機本乎形而入用乃委質以合所塗城則踈勒解圍
封關則峭函致阻及其見棄形晦跡淪無勞切玉之劒
自落成風之斤體伊泥之應變時可同乎人志類明鏡
之受物若洪鐘之虛已既懸絕於白雲徒隱淪於綠水
伊吾人之非賤竊亦有感於斯矣

塵賦

有序

唐
謝 偃

余執性介直動多違忤茲讀老子至和光同塵竊有慕

焉因而賦之

伊大噫之扇物氣無繫而不揚惟茲塵之宜昧何動息
之順常若乃寄形大颺託質厚地倏爾而往忽焉而至
乍徘徊以上騰或飄颻而下墜起彼集此不失厥位居
無不安涉無不利似達人之推理任逍遙以自肆若夫
陰風發陣雲屯鼉鼓震紅旗翻千乘動萬騎奔中原以
之黯色白日為之晝昏其興也勃其息也漸或聚或散
乍舒乍歛細不可拾輕不可掩蒙籠篋笥幕厯茵簟隨

時無競應物不違值細雨而暫息逢輕風而復飛霍霍
靡靡零零霏霏將晨軒而並出與暮蓋而同歸任動靜
而無累似識變而知機若夫拂珠履生羅襪積菱鏡而
鸞沉下雕梁而歌發散瓊臺而類粉布玉階而似雪蒙
鳳輦於銅衢翳龍媒於金埒有動必隨無空不遍出入
青瑣遊揚紫殿流細影於迴裾亂浮香於舉扇隱洞房
而難覩因隙光而可見既洋溢若浮烟又散漫如流霞
至如化衣京洛鍊石仙家色侔雨壤影雜飄沙逐奔蹄

而起亂隨驚輪而飛斜近則昏阡蔽陌遠則晦景韜霞
疑竊食於顏子先甘餌於玄蛇惟紛吾之孤介驟萍流
而蓬徙既守愚以周直每受訕而招毀屢空范丹之甌
時卧李恂之被未齋物於莊生庶同塵於老氏

珠塵賦

以輕細若塵風
未遂起為韻

唐王 榮

丹海之濱青珠似塵蓋輕細以無滯遂飛揚而有因或
照或吹自得霏微之象乍明乍滅誰分圓潔之真稽夫
始自水涯俄從風起縈空而耀耀奚匹散彩而冥冥相

似又云來或鳥銜積如丘峙半穿圓隙影寒於雲母屏
中或委空牀光亂於水晶簾裏徒觀夫的皦晶熒星流
雪輕集素衣而不垢侵曉鏡以逾明落澗客之盤驚炫
耀以同色撲江妃之珮訝依微而有聲至如琪樹春歸
玉樓景霽揉瓊蕊以光碎浮瑣牕而影細闌干輕舉同
羅襪之生時璫錯斜流有歌梁之下勢由是散亂清景
光芒碧空昔隱耀於泥沙之地今揚輝乎堀堞之風不
逐軒車之後不在京洛之中雨過而光騰鮫室扇迴而

影動龍宮如是則可用增山難將彈雀惹晴葉於垂樹
間游絲而綴箔自南自北低瑤席以紛然匪疾匪徐拂
璇題而炯若況海日方盡陰飈乍迴與白駒而競起將
野馬以俱來魏國飛時頓失照車之體陳王望處全無
凝榭之猜懿夫朗潔難逾飛騰自遂非罔象之見索異
無脛而斯至或曰泰山猶不讓微塵況是珠璣之類

陳塵賦

以不依光末難
見微實為韻

唐
蔣防

惟陳有輝惟塵是依微明散亂若動如飛殊向晦以宴

息類趨明而識機不逐大車寧發詩人之歎無昏廣陌

詎緇遊子之衣觀乎杲杲初陽沉沉閭室纖光乍進爰
委其質忽烟涵而霧貫每延風而寫日透綺帳而偏明
暖丹楹而乍失不重乎金屋不貴乎華堂隨明則著在
映而彰代皆擇其居我則不辭於處隙代皆異其志我
則不厭乎和光似有情而聚散若任理以行藏漠漠如
流翳白駒之逸影濛濛不息起清唱於雕梁惟深惟微
于閨于闥來不可止去不可遏語其志也流形似競於

分陰語其微也弱質已侔於毫末豈不以循其陳襲其
輝洞幽房之曠朗籠踈牖之霏微道或未行歎浮沈之
異路時而後動任韜晦以同歸散漫迴環空濛循練謂
醯雞之乍覩疑野馬之潛見不爭鄰女之光不雜寒階
之霰故知委范甌者志有所未安感孔顏者時有所未
歡處沉冥而匪異辨疑似而愈難曷若因孤光而有託
附影流而為觀者哉所謂暗而能彰虛而能受望彈冠
而自必騰清路而何不幸承命於光塵賦斯文而藉手

陳塵賦

以不依光末難
見微質為韻

唐
楊弘真

隙有塵兮則惟其常日緣隙兮亦孔之彰何在陰而滅
彩能委質以和光藹若成規任隙中之小大紛然無緒
隨日際以悠揚觀夫熠熠孤光霏霏素質盡方圓之所
至滿虛明而不溢不灑不埽宜靜以探微或歛或吹則
動而逾密何幕歷以可久混空濛而為一一點凝輝異
出同歸豈開簾而霰入疑向牖之蟲飛其虛其徐有若
無兮漠漠不皦不昧散而聚兮微微既不足以凝榭又

何虞於化衣想夫向晦長存匪陽不見的爾東去忽焉
西轉嗟柳絮之從風訝雪花之見睨翔而不息安即為
難挂高棟而將晚留空隅而助寒疑琢玉成環環中屑
墜若窺壺入洞洞裏雲殘美纖姿而無隱雖小道而可
觀原夫自託於空而隙能善誘無求於日而隙以虛受
察之昭精攬之盈手同白駒之滅沒非野馬之紛踪遠
窺濁水斯自異於浮沈仰觀歌梁必坐分於妍不美其
含華有耀委照無違想剝廬之斯衆知舊館之猶稀安

金方口人卷二十一
寢之堂就餘光而若在偷光之壁尋微燭以相依何異
暗室無欺明誠必達伊若質之隱見在無私之與奪儻
高鑒以吹噓願飛翔於天末

陳塵賦

以不依光末難
見微質為韻

唐


趙蕃

日入空隙塵生夜光嘉的的以初引見冥冥而自彰乍
拂圓輝積纖形而散亂時搖輕吹翻弱質以悠揚泊夫
託彼曜靈起茲虛室恒紛空而色碎每燭幽而景密仰
孤光之未及猶在暗而效質由是亭亭旁照翼翼科飛

必炯爾以賦象終飄然而相依故所以臨素壁隱清輝
若下歌梁方凝姿而漠漠如驚陳榻幾引耀以霏霏是
故當皎晶以自飛引虛光而將扇振遺芳而交集流細
影而倏遍散乎幽處非厚地而不揚透彼無間庶高天
而可見爾其晶明下射香靄中攢景熠熠以將盡視規
規而尚殘及晶輝之餘斜分稍易當冥濛之際仰望誠
難至若窈窕孤懸熒煌相蹂靜對幽闥閒臨虛牖窮隱
見而不讓隨方圓而可久若然者則混而同貫自得審

於浮沉浩以相鮮孰可辨於妍不是以杳如有待紛若
無機穿棟宇以光小拂簾櫳而色微片影方呈似鑿幽
人之室輕文靡定如縑遊子之衣故其餘照乍沈纖埃
勞達既在陰而不昧將耀質而難奪亦何必越茫洋散
空闊願依大廈之內永寄流光之末

御定歷代賦彙卷二十三



總校官庶吉士臣張能照
校對官編修臣馬啓泰
謄錄監生臣夏清和

欽定四庫全書叢要

集部

御定歷代賦彙卷二十四

欽定四庫全書蒼要卷一萬七千二百四十三

集部

御定歷代賦彙卷二十四

地理

海賦

晉
木華

在帝媯臣唐之世天網淳涵為洞為療洪濤澗汗萬

里無際長波沓沲迤涎八裔於是乎禹也乃鑿臨崖之
阜陸決陂潢而相浹啟龍門之峽嶺墾陵巒而斬鑿羣
山既略百川潛滌決溝澹泞騰波赴勢江河既導萬穴

俱流掎拔五嶽竭涸九州漑滴滲淫蒼蔚雲霧涓流決
讓莫不來注於廓靈海長為委輸其為廣也其為怪也
宜其為大也爾其為狀也則迺洩洑瀲灩浮天無岸沖
融沆瀣渺瀰淡漫波如連山乍合乍散噓噏百川洗滌
淮漢襄陵廣斥膠瀉浩汗若迺大明撫轡於金樞之穴
翔陽逸駭於扶桑之津影沙礫石蕩颺島濱於是鼓怒
溢浪揚浮更相觸搏飛沫起濤狀如天輪膠戾而激轉
又似地軸挺拔而爭迴岑巖飛騰而反覆五嶽鼓舞而

相砥涓涓淪而瀉潔鬱泐迭而隆頽盤盪激而成窟消
泮滌而為魁涸泊柏而迤颺磊矍矍而相砥驚浪雷奔
駭水迸集開合解會灤灤濕濕葩華踧沮瀕瀕淶淶若
迺靈暄潛銷莫振莫竦輕塵不飛纖蘿不動猶尚呀呬
餘波獨湧彭瀾灣礧礧山壘爾其枝岐潭淪渤蕩成
汜平蠻隔夷迴互萬里若迺偏荒速告王命急宣飛迅
鼓楫汎海凌山於是候勁風揭百尺維長綯挂帆席望
濤遠決罔然鳥逝鷗如驚鳧之失侶倏如六龍之所掣

一越三千不終朝而濟所屆若其負穢臨深虛誓愆祈
則有海童邀路馬銜當蹊天吳乍見而髣髴蜺象暫曉
而閃屍羣妖邁迓眇眇冶夷決帆摧撞戕風起惡廓如
靈變忽怳幽暮氣似天霄黻黻雲布霍昱絕電百色妖
露呵嗽掩鬱矐睽無度飛滂相礮激勢相沕崩雲屑雨
泫泫汨汨踈踈湛漭沸潰渝溢灌漑濇渭蕩雲沃日於
是舟人漁子徂南極東或屑沒於鼃鼃之穴或挂罟於
岑嶽之峯或掣掣洩洩於裸人之國或泛泛悠悠於黑

齒之邦或迺萍流而浮轉或因歸風以自反徒識觀怪
之多駭迺不悟所歷之近遠爾其大量也則南澣朱崖
北灑天墟東演析木西薄青徐經塗溁溟萬萬有餘吐
雲霓含龍魚隱鯢鱗潛靈居豈徒積太顛之寶貝與隨
侯之明珠將世之所收者常聞所未名者若無且希世
之所聞惡審其名故可仿像其色覈蘊其形爾其水府
之內極深之庭則有崇島巨鼇崕岬孤亭摩洪波指太
清竭磐石栖百靈颺凱風而南逝廣莫至而北征其垠

則有天琛水怪鮫人之室瑕石詭暉鱗甲異質若迺雲
錦散文於沙汭之際綾羅被光於螺蚌之節繁采揚華
萬色隱鮮陽冰不治陰火潛然熇炭重燔吹炯九泉朱
燼綠烟曖眇蟬蛸珊瑚琥珀羣產接連車渠馬瑙全積
如山魚則橫海之鯨突抗孤遊夏巖叢偃高濤茹鱗甲
吞龍舟喻波則洪連踰蹈吹滂則百川倒流或迺蹭蹬
窮波陸死鹽田巨鱗插雲鬣刺天顱骨成嶽流膏為
淵若迺巖坻之隈沙石之嶽毛翼產殼剖卵成禽鳧雛

離襍鶴子淋滲羣飛侶浴戲廣浮深翔驚連軒洩洩淫
淫翻動成雷擾翰為林更相叫嘯詭色殊音若迺三光
既清天地融朗不汎陽侯乘蹻絕往覲安期於蓬萊見
喬山之帝像羣仙縹眇餐玉清涯履阜鄉之留鳥被羽
翮之縻褱翔天沼戲窮溟甄有形於無欲永悠悠以長
生且其為器也包乾之奧括坤之區惟神是宅亦祇是
廬何奇不有何怪不儲茫茫積流含形內虛曠哉坎德
卑以自居弘往納來以宗以都品物類生何有何無

海賦

晉庾闡

昔禹啓龍門羣山既鑿高明澄氣而清浮厚載勢廣而
盤礴坎德洊臻水源深博灌注百川控清引濁始乎濫
觴委輸大壑測之渺而無際望之杳而緜漠鬱拂冥茫
往來日月朏魄昏微乍明乍沒若夫長風鼓怒涌浪碎
礧颶波於萬里之間漂沫於扶桑之外於是百川輻輳
四瀆橫通迴颶決漭聳散穹隆映曉雲而色暗照落景
而俱紅驚浪堯堯眇漫澗汨瀟漭潺湲浮天沃日鯨鯢

蘊而乍見蚪螭涌而競遊靈鼉朱鼉出沒爭浮騰龍掣
水巨鱗吞舟

海賦

晉
張融

蓋言之用也情矣形乎使天形質內敷情敷外質者言
之業也吾遠職荒官將海得地行關入浪宿渚經波傳
懷樹觀長滿朝夕東西無里南北如天反覆懸鳥表裏
兔色壯哉水之奇也奇哉水之壯也故古人以之頌其
所見吾問翰而賦之焉當其濟興絕感豈覺人在我外

木生之作君自君矣分渾始地判氣初天作成萬物為
山為川總川振會導海飛門爾其海之狀也之相也則
窮區沒渚萬里藏岸控會河濟朝總江漢回混浩潰巔
倒發濤浮天振遠灌日飛高縱撞則八紘摧隕鼓怒則
九紐折裂增長風以舉波瀾天地而為勢溼澤潏洽來
往相拉汨深澍渤窅石成窟西衝虞淵之曲東振湯谷
之阿若木於是乎倒覆折扶桑而為渣濩灤澗渾涓和
硯雍渤淬淪溥瀾淺壟嵒湍轉則日月似驚浪動而星

河如覆既烈太山與崑崙相壓而共潰又盛雷車震漢
破天以折轂漣瀾轉縱橫揚珠起玉流鏡飛明
是其回堆曲浦幽闕弱渚之形勢也沙嶼相接洲島相
連東西蕩滴如滿於天梁禽楚獸胡木漢草之所生焉
長風動路深雲暗道之所經焉苔苔帶帶窅窅翳晨
烏宿於東隅落河浪其西界茫沆汴河汨硯漫桓旁踞
委岳橫竦危巒重彰岌岌攢嶺聚立律礪嶽嶽架石相
陰陰隤隤橫出旁入鬼鬼磊磊若相追而下及峰勢

縱橫岫形參錯或如前而未進乍非遷而已却天抗暉
於東曲日倒麗於西阿嶺集雪以懷鏡巖昭春而自華
江澤泊泊滌巖拍嶺觸山礮石汗汚溼沉礮決澗河流
柴磳屹頓浪低皮蓉破砣折嶺挫峰牢浪礪培朋山相
礮萬里藹藹極路天外電戰雷奔倒地相礮獸門象逸
魚路鯨奔水遽龍魄陸振虎魂却瞻無後向望行前長
尋高眺唯水與天若乃山橫蹴浪風倒摧波磊若驚山
竭巖以竦石鬱若飛煙奔雲以振霞連瑤光而交綵接

玉繩以通華爾乎夜滿深霧晝密長雲高河滅景萬里
無文山門幽暖岫戶益益九天相掩王地交氛汪汪橫
橫沆沆浩浩淬潰大人之表決蕩君子之外風沫相排
日閉雲開浪散波合岳起山隕若乃漉沙構白熬波出
素積雪中春飛霜暑路爾其奇名出錄詭物無書高岸
乳鳥橫門產魚則何羅鰮鰕鰾鰼鯢日吐霞吞河
漱月氣開地震聲動天發噴灑噦噦流雨而揚雲喬體
壯脊架岳而飛墳踴動崩五山之勢睢眴煥七曜之文

蟠螭瑁蚌綺貝繡螺玄朱互綵綠紫相華遊風秋瀨泳
景登春伏鱗漬綵昇魴洗文若乃春代秋緒歲去冬歸
柔風麗景晴雲積暉起龍塗於靈步翔螭道之神飛浮
微雲之如曹落輕雨之依依觸巧塗而砥遠抵欒木以
激揚浪相礪而起千狀波獨湧乎一萬容蘋藻留映荷
芰提陰扶容曼綵秀遠之深明藕移玉清蓮代金盼芬
芳於遙渚汎灼爍於長潯浮鱸雜舳遊舶交艘惟軒帳
席方遠連高入驚波而箭絕振排天之雄颺越湯谷以

逐景渡虞淵以追月徧萬里而無時決天地於揮忽雕
隼飛而未半鯢龍趯而不逮舟人未及復其喘已周流
宇宙之外矣陰鳥陽禽春毛秋羽遠翅風遊高翮雲舉
翔歸棲去連陰日路瀾漲波渚陶玄浴素長絃四斷平
表九絕雉翥成霞鴻飛起雪合聲鳴侶並翰翻羣飛闕
溢繡流浦照文爾夫人微亮氣小白如淋涼空澄遠增
漢無陰照天容於鯢渚鏡河色於魴潯括蓋餘以進廣
浸夏洲以洞深形每驚而義維靜跡有事而道無心於

是乎山海藏陰雲塵入岫天英徧華日色盈秀則若士
神中琴高道外袖輕羽以衣風逸玄裾於雲帶筵秋月
於源潮帳春霞於秀瀨曬蓬萊之靈岫望方壺之妙闕
樹過日以飛柯頽回峰以蹴月空居無俗素館何塵谷
門風道林路雲真若乃幽崖隄陬隈隩之窮駿波虎浪
之氣激勢之所不攻有卉有木為灌為叢路糝網雜結
葉相籠通雲交拂連韻共風蕩洲礮岸而千里若崩衝
崖沃島其萬國如戰振駿氣以擺雷飛雄光以倒電若

夫增雲不氣流風斂聲濶文復動波色還驚明月何遠
沙裏分星至其積珍全遠架寶諭深瑤池玉壑珠岫珎
岑合日開夜舒月解陰珊瑚開續瑠璃竦華丹文鏡色
雜照冰霞洪洪潰潰浴干日月淹漢星墟滲河天界風
何本而自生雲無從而空滅籠麗色以拂烟鏡懸暉以
照雪爾乃方員去我混然落情氣暄而濁化靜自清心
無終故不滯志不敗而無成既覆舟而載舟固以死而
以生弘芻狗於人獸導至本以克形雖萬物之日用諒

何緯其何經道湛天初機茂形外亡有所以而有非膠
有於生末亡無所以而無信無心以入太不動動是使
山岳相崩不聲聲故能天地交泰行藏虛於用舍應感
亮於圓會仁者見之謂之仁達者見之謂之達喆者幾
於上善吾信哉其為大矣

滄海賦

魏文帝

美百川之獨宗壯滄海之威神經扶桑而遐逝跨天涯
而託身驚濤暴駭騰涌澎湃鏗旬隱潏涌沸凌邁於是

鼃鼃漸離泛濫浮遊鴻鸞孔鵠哀鳴相求揚鱗濯翼載
沉載浮仰啞芳芝俛漱清流巨魚橫奔厥勢吞舟爾乃
釣大貝採明珠寧懸黎收砮硃窺大麓之潛林覩瑤木
之羅生上蹇產以交錯下來風之泠泠振綠葉以歲蕤
吐芬葩而揚榮

滄海賦

晉
潘岳

徒觀其狀也則湯湯蕩蕩瀾漫形沈流沫千里懸水萬
丈測之莫量其深望之不見其廣無遠不集靡幽不通

羣谿俱息萬流來同舍三河而納四瀆朝五湖而夕九
江陰霖則興雲降雨陽霽則吐霞曜日煮水而鹽成剖
蚌而珠出其中有蓬萊名嶽青丘奇山阜陵別島環
其間其山則螺崔嵬崢嶸峨降屈披滄流以特起擢崇
基而秀出其魚則有吞舟鯨鯢烏鰂龍鬚蜂目豺口狸
斑雉軀怪體異名不可勝圖其蟲獸則素蛟丹蚪元龜
靈鼈修鼃巨鼈紫貝螭蛇玄螭蚺蚪赤龍焚蘊遷體改
角推舊納新舉扶搖以抗翼泛陽侯以濯鱗其禽鳥則

鷗鴻鵠鷁駕鷺鵠鵠朱背煒燁縹翠蔥菁詳察波浪之
來往遍聽奔激之音響力勢之所迴薄潤澤之所彌廣
信普天之極大橫率土而莫兩

大壑賦

梁簡文帝

渤海之東不知幾億大壑在焉其深無極悠悠既湊滔
滔不息觀其浸受壯其吞匿歷詳衆水異導殊名江出
濯錦漢吐珠瑛海逢時而不波河遇聖而知清嗟乎使
夫懷山之水積天漢之流駛彭潛與渭濕俱臻四瀆與

九河同至余乃知巨壑之難滿尾閭之為異

覽海賦

漢班固

余有事於淮浦覽滄海之茫茫悟仲尼之乘桴聊從容而遂行馳鴻瀨以漂驚翼飛風而迴翔顧百川之分流煥爛漫以成章風波薄其裊裊邈浩浩以湯湯指日月以為表索方瀛與壺梁曜金瑋以為闕次玉石而為堂寔芝列於階路涌醴漸於中唐朱紫彩爛明珠夜光松喬坐於東序王母處於西廂命韓衆與岐伯講神篇而

校靈章願結旅而自託因離世而高遊騁飛龍之驂駕
歷八極而迴周遂竦節而響應忽輕舉以神浮導霓霧
之掩蕩登雲塗以凌厲乘虛風而體景超太清以增逝
麾天閣以啓路闢閭闔而望余通王謁於紫宮拜太乙
而受符

遊海賦

魏王粲

乘菌桂之芳舟浮大江而遙逝翼驚風而長驅集會稽
而一晚登陰隅以東望覽滄海之體勢吐星出日天與

水際其深不測其廣無臬尋之冥地不見涯洩章亥所
不極廬敖所不屈懷珍藏寶神隱怪匿或無氣而能行
或含血而不食或有葉而無根或能飛而無翼鳥則爰
居孔鵠翡翠鸛鷀繽紛往來沈浮翔魚則橫尾曲頭
方目偃頤大者若山陵小者重鈞石乃有賁蛟大貝明
月夜光螭鬬瑤金質黑章若夫長洲別島碁布星峙
高或萬尋近或千里桂林叢乎其上海瑚周乎其趾羣
犀代角巨象解齒黃金碧玉名不可紀洪洪洋洋誠不

可度也處嵎夷之正位兮同色號於穹蒼色納污之弘
量正宗廟之紀綱總衆流而臣下為百谷之君王

望海賦

晉
孫綽

五湖同浸九江叢漑抱河含濟吞淮納泗南控沅湘西
引涇渭洲渚迢遞以疏屬島嶼縣邈以牢羅殖蒐崔之
碣石構穹隆之牂牁玄奧之府重仞之房鱗彙萬殊甲
產無方包隨珠銜夜光璫瑁熠爍以泳游蜻螭煥爛以
映漲虛貝含素而表紫螻蠓螺絡丹而帶紺青甲芬飈以

微扇玄木杳眇以舒芳其卉木則綠苔石髮蔓以流緜
紫莖葸綜解以被渚華組依波而錦披翠綸扇風而繡
舉長鯨嶽立以截浪虬鰐揚鬚以排流巨鼇巋肩以冠
山鳥鰲呼翕以吞舟鵬為羽傑鯤稱介豪翼遮半天背
負重霄舉翰則宇宙生風抗鱗則四瀆起濤考萬川以
周覽亮天地之綜緯彌綸八荒亘帶九地昏明注之而
不溢尾閭洩之而不匱

曙海賦

明
劉守元

余居南海之濱覽燕雲之勝汴河涉濟反江南窺吳會
樂人文之秀而資麗澤之隆也有主人傾而長慧質宏
中其氣如虹揖余而問海之曙焉余曰子欲觀於曙海
乎乾洩而坤盞天浸而地瀆潏潏漾潏潏潏潏潏潏潏
滔淫瀾濩漫汗當其朝暉曇曇倉楮曳藍宗陽載升霞
彩竟天洪濤不驚蛟龍蟄淵汨汨沒沒渾渾涵涵意象
蒼然萬里茫茫須臾澹烟盡收於天為極桃浪躍金瓊
波碎壁琉璃綴綠凌虛若滴近則漁歌唱曉鷗鷺鳬鷗

將鳴欲食悠然自得遠則島外揚輝海鷗仙槎舳艫檣
席颼颼瀝瀝孤峰數點天風瑟瑟紫氣林林地維以滌
八柱砥流六鼇浴德跂蓬萊於髣髴鮫室依稀乎如覓
望安期於縹渺徐市優游以入適河伯就朝於溟宮海
若出會乎天澤鱗介角果之族吸朝華以葆真青紫黑
赤之毛潤晨涓而增色於斯時也四外太清指顧可得
東望滄溟銀山雪屋蜃氣繽紛西盼流洋冥樞千尋天
倚日隔北觀瀚海鯤鵬奮擊翬百尺南窺太渤大士

現身祥光拱翼蓋崇朝而皆然繫四海之一色又如勾
芒司晨葭灰夜轉寅賓出日黛流翠浣祝融南來火龍
燔軸巨浸電閃浮光掩映大火西流金波起颺玉色橫
空一氣如練不周主神龜蛇為相三三層九瓊花舞濺
四時不同各如其象斯天下之大觀於晨輝而始絢雖
源深而流長亦夜氣之所養彼晦冥之牯亡自因時而
有遷子欲觀於曙海其有感於平旦之未央主人矍然
曰夫海亦資於夜氣乎余曰奚而不資也天地之氣於

海馬鍾矣其名曰大瀆其位曰尾閭其象曰沃焦釜方
其潛氣於寂隨月而汐神妃閉扃少女屏息天一為滋
地六為澤漾玉兔之精華隱金烏於玄默悠悠乎洗天
浴日之功浩浩乎光風霽月之宅是以曙氣澄清旨趣
融液大丈夫昧爽丕顯襟懷灑灑旦氣凝眸一覽而悉
心兮本虛會逢其適天光雲影浩然自得淵乎意象之
兩亡蕩乎天壤之俱闢煥乎文章之見澹乎躁心之釋
觀海者而有得於斯庶幾乎迴脫於陳迹主人聞而憚

趨而避席謝不敏遂書以號之曰曙海之客

衆水歸海賦

以納衆流而成深廣為韻

唐闕名

大矣哉海浩漾尋之無際望之無象利萬物以成德總
羣川而為長柔能善下稟巨壑以包涵握而朝宗覩衆
流之歸往是以臨不測者未足言其濟深思利涉者孰
可詠其河廣究其所由得之在柔濫觴之初因一勺而
畎澮循環無際想三歲之周流伊昔洪水方割夏禹是
理既濬崑崙之輸爰標南國之紀故導之逾遠非壅之

可止將虛受之為德諒成大而有以且明乎避高之義
自得乎潤下之旨始將就濕將浩浩而其來終類沃焦
見滔滔之未已原夫水反於壑海不厭深其有也靡患
乎汎濫其細也不逆於浸淫是知衆流同歸異源將合
注而不竭但見乎川流滿而不盈更因乎海納廣哉巨
瀛莫之與京萬里波委四時砥平灌以涇不能混其濁
注以渭不能益其清不涌浪而跳沫獨持盈而守成故
得萬穴爭赴九河自同類夫雲之從龍鳥之附鳳又似

一人立國萬方入貢願以舍垢之體為納汙之諷因知
夫海為川谷之王以寬而得衆

江漢朝宗賦

以百川會流必
歸於海為韻

唐

樊陽源

江漢之流始滔滔乎楚澤雖導源而則異必朝宗而來
格故能吞別派而且千壅細流而累百初謂發岷山之
濺濺出蟠冢而涓涓忽洊至以盈坎遂同歸於巨川洋
洋不窮驅迅波以來注浩浩何足走驚浪而方前沸渭
迸瀨崩奔爭會過東陵而更長歷南國而彌大引汲清

濁并包畎澮始逶迤於域中終委輸於區外雙流淼淼
並驚悠悠瀉汗乎萬里經營乎數州靜委極深且無驚
於海若潛盈巨壑亦何怒於陽侯彼弘納之無際信為
長於百流爾其揭厲莫從深淺無必絕地脈於颶駛透
天池而箭疾善下以潔乎龍堂流謙更清乎鮫室就其
深矣誰識濫觴之源不可方思空想觸舟之實終始齊
赴周流不違似有待而俱進何經始之相依演漾紆餘
必遠分而適合洄狀激射雖異出而同歸則知海之為

量也虛而有餘水之趨本也道亦相於二派既朝於滄
海衆星如拱於辰居漢之廣分明委積之有所江之永
矣表靈長之在諸是俾涵虛之狀益深浮天之容斯在
苟歸塘之不息諒納汙而惟倍大矣哉誰究其廣深空
有望於靈海

江漢朝宗賦

元
黃師郊

玄黃莫極混沌攸分屹岷峨之西峙發天一之玄精沛
靈液以長流亘天南之緯經激逸勢以遄驅送馳波於

滄溟譬萬國之會同咸疾趨於紫宸茲江漢之東注所以著朝宗之徽稱者歟時其春濤浩漲萬壑流液駭浪翻空天網浮涵激三澨而霆喧浸峽雲而影沒騰蛟鼓躍而噴風怒蛺霍揮而翳日長驅震鐵騎之西來支流若附庸之畢集望滄海之茫茫倡百川而全入雖百折而必東靡回波之頽息茲非諸侯春見而曰朝於以覲王庭而述職者乎又若陰風怒號濁浪排空巨浸稽天而浩浩驚濤觸石以溶溶始兩川之並駕終合勢而景

從雷轟於大別之下電繞於廬阜之衝渺乾坤其浮浮
蘸旭影之瞳瞳飛流駭奔走塗山之玉帛狂瀾澎湃集
王會之琛琮茲非諸侯夏見而曰宗於以朝京師而會
同者乎余嘗快西風之曉晴駕兩龍兮北征朝吾道兮
江浦夕余憩兮漢濱覽形勝之茫茫黯寒烟兮夕汀洞
庭南瀉蕩天光之一碧赤壁西望俯洪流而下臨蜀山
逶迤而送色楚澤浩渺而連雲鳬鷺低徊於煙渚葦花
點綴於寒津濯纓子滄浪之浦游目乎鵠山之岑余於

是有所感矣思昔龍門未闢環海湯湯慨尾閭之未洩
肆川后之陸梁惟聖神之惻然乘四載而彷徨經蟠冢
以導漢隨岷山而入江障狂瀾而東驚若日月之回光
迨夫輒坤岳奠川澮羣流循徑以汨滴飛滂摧雲以距
海各順序而安行孰奔騰而橫潰觀物理之有常等民
彝之不昧思禹功而當年實萬世之永賴嗟夫觀水於
窮壤之間知物有君臣之義大而麗天之象緯微而在
物之螻蟻雖氣類之萬殊實均具夫此理何世降於春

秋迴霸圖之殊異嗟河陽之書狩秉麟筆之微意在桓
文而尚爾於吾楚夫何忌觀逝者之如斯能不怛怛而
媿死此余於江漢之朝宗安得不悵然而長喟惟聖元
之御極總萬國以來庭雖海隅之遐陬亦梯航而貢琛
藐余忝於楚產懷朝宗之至心鼓三汲之巨浪振修鱗
於禹門爰寄悰於江漢聊行意於斯文

江漢朝宗賦

元

李原同

緊鴻濛之肇判兮奠高深於西東維百川之朝海兮羌

四方其皆同問江漢其何取兮乃獨謂彼為朝宗豈岷
嶓之高峙兮故下流之奔躍勢已順之自然兮曾不假
夫疏濬抑孰知龍門之未鑿兮渺巨浸之稽天瀦九州
於一壑兮又何有乎茲川彼衆水之無謀兮紛陸梁其
扼塞勢驕逞而不摧兮咸齟齬而未入想江漢於此時
兮雖欲朝宗而不可得逮神標之遍歷乃載疏而載通
泄歸墟以不溢兮決險阻而無壅臨茲水之妥帖兮乃
靡然而來通排淮泗以爭先兮駛沅湘而互後過重湖

且於焉止息奕潛沱其駿奔走導龍灣而罄折兮全鄂
渚其輻湊豐豐渺其依乘沅辰浩其雲從汝墳於焉而
效順兮資漸於焉而附庸滔滔汨汨相與會同兮安行
而不怒流內方而鳬趨兮曾何有夫跋扈經雲夢而魚
貫兮咸遵道而得路驚春湍漲以澎湃湧銀屋之嵯峨
恍諸侯之來朝兮鏘劒佩之相磨夏潦盡而安流兮湛
淤碧其無波又若干乘之來宗噦鸞聲之載和幕阜旁
圍而莫留兮大別橫絕而莫禦羣山蹈舞以送迎兮若

回旋而不能去後天吳使奔屬兮前陽侯使前驅湘靈
為之清道兮令海若兮舞馮夷鮫人隨以貢珍兮望洋
於焉而獻奇玄螭赤鱗並前進兮形蚺蜥而逶迤望海
門之偃蹇兮渺衆流之君長萬壑注而不溢兮信厥量
之至廣矧江漢有君臣之義兮舍茲名兮焉往彼在山
而過潁兮豈其性之本初相彼水其尤若茲兮可以人
而不如覩洞庭之落葉兮歎三苗之弗率見赤壁之歸
帆兮嗟孟德之至逆渺汨羅之流沙兮嘉三閭之精忠

宜流聲之泚泚兮與茲水而始終睇廟庭之古柏兮慨
神禹其安在偉疏鑿之宏功兮歷萬世其永賴昔劉子
之行役兮尚河洛之生悲暨韓侯之入覲兮託梁山而
興思況江漢之湯湯兮實吾生之所依夫既出於昏墊
兮奠爾居其誰伊念明德之既遠微斯人兮吾其歸乃
歌曰漢之廣矣孰初濬之江之永矣孰其鑿之維江維
漢春朝夏宗神禹之功江漢無窮

海潮賦

有序

唐
盧 肇

夫潮之生因乎日也其盈其虛繫乎月也古君子所未究之將為之辭猶憚夫有所未通者故先序以盡之肇始窺堯典見歷象日月以定四時乃知聖人之心盖行乎渾天矣渾天之法著陰陽之運不差陰陽之運不差萬物之理皆得萬物之理皆得其海潮之出入欲不盡著將安適乎近代言潮者皆驗其及時而絕過朔乃興月弦乃小贏月望乃大至以為水為陰類牽於月而高下隨之也遂為濤志定其朝夕以為萬古之式莫之逾

也殊不知月之與海同物也物之同能相激乎易曰天地睽而其事同也男女睽而其志通也夫物之形相睽而後震動焉生植焉譬猶烹飪置水盈鼎而不爨之欲望膳羞之熟成五味之美其可得乎潮亦然也天之行健晝夜復焉日傳於天天右旋入海而日隨之日之至也水其可以附之乎故因其灼激而退焉退於彼盈於此則潮之往來不足怪也其小大之期則制之於月大小不常必有遲有速故盈虧之勢與月同體何以然日

月合朔之際則潮殆微絕以其至陰之物適於至陽是以陽之威不得肆焉陰之輝不得明焉陰陽敵故無進無退無進無退乃適平焉是以月之與潮皆隱乎晦此潮生之實驗也其朧其朧則潮亦隨之乃知日激水而潮生月離日而潮大斯不刊之理也古之人或以日如平地執燭遠則不見何甚謬乎夫日之入海其必然之理乎且自朔之後月入不盡晝常見焉以至於望自望之後月出不盡晝常見焉以至於晦見於晝者未嘗有

光必待日入於海隔以映之受光多少隨日遠近近則
光少遠則光多至近則甚虧至遠則大滿此理又足證
夫日至於海水退於潮尤較然也肇適得其旨以潮之
理未始著於經籍間以類言之猶乾坤立則易行乎其
中易行乎其中則物有象焉物有象而後有辭此聖人
之教也肇觀乎日月之運乃識海潮之道識海潮之道
亦欲推潮之象得其象亦欲為之辭非敢銜於學者蓋
欲請示千萬祀知聖代有苦心之士如肇者焉賦曰

開圓靈於混沌包四極以永貞輓至陽之元精作寒暑
與晦明截穹崇以高步涉浩漾而下征迴適烏於兩至
曾不愆乎度程其出也天光來而氣曙其入也海水退
而潮生何古人之守惑謂茲濤之不測安有夫虞泉之
鄉沃焦之域棲悲谷以成暝浴濛汜而改色巨鱗隱見
以作規介人呼吸而為式陽侯玩威於鬼工伍胥洩怒
乎忠力是以納人於聾昧遺羞乎後代曾未知海潮之
生兮自日而太陰裁其小大也今將考之以不惑之理

著之於不刊之辭陳其本則晝夜之運可見其影響言
其徵則朔望之候不爽乎毫釐豈不謂乎有耳目之疾
而燿將判乎神醫者也粵若太極分陰分陽陽為日故
節之以分至啓閉陰為水故霏之以雨露雪霜雖至蹟
而可見雖至大而可量豈謂居其中而不察乎沙漠亡
其外而不考其茫洋者哉故水者陰之母日者陽之祖
陽不下而昏曉之望不得成陰不升而雲雨之施不得
覩因上下之交泰識洪濤之所鼓胡為乎歷象取其枝

葉而迷其本根也策其涓滴而喪其泉源也於是欲挾其所迷而論之採其所長而存之光乎廓乎汨磅礴乎差澠溟之無際曷鴻濛而可以盡度乎乃知夫言潮之初心遊六虛索蜿蜒乎乾龍駕轆轤乎坤輿知六合之外洪波無所洩識四海之內至精有所儲不然何以使百川赴之而不溢萬古揆之而靡餘也是乃察乎濤之所由生也駭乎哉彼其為廣也視之而盪盪矣彼其為壯也欲乎其沆沆矣其增其贏其難為狀矣當夫巨浸

所稽視無顛倪洶涌瀕洞窮東極西浮厚地也體定半
圓天而勢齊謂無物可以激其至大故有識而皆迷及
其碧落右轉陽精西入抗雄威之獨燥卻衆柔之繁濕
高浪瀑以旁飛駭水洶而外集霏細碎以霧散屹奔騰
以山立巨泡丘浮而迭起飛沫電燄以驚急且其日之
為體也若熾堅金圓徑千里土石去之稍邇而必焚魚
龍就之雖遠而皆靡何海水之能逼而不澎漚沸渭以
四起故其所以凌鑠其所以薄激者莫不魄落焯爍如

繫巨鑊艸兮不可探乎荒荒之內呀焉若天地之有齟
齬其始也漏光迸射虹截寓縣拂長庚而尚隱帶餘霞
而未殄其漸沒豹兮若后羿之時平林載馳驅貙虎與
兕象懾千熊及萬羆呀偃蹇而矍鑠忽劃礫而齧齟其
少進也若兆人繽紛填城溢郭蹄相蹂蹙轂相摩錯闕
闐澶漫凌彊侮弱倏皇輿之前蹕孰不奔走而揮霍及
其勢之將極也湝兮若牧野之師昆陽之衆定足不得
駭然來奔騰千壓萬蹴搏沸亂雄稜後閼懦勢前判懾

仁兵而自僵倏谷呀而嘯斷此者皆海濤遇日之形聞者可以識其畔岸也賦未畢有知玄先生諷之曰斯義也古人未言吾將耀乎文墨之場以貽永久為天下稱揚爰有博聞之士駭潮之義始盱衡而抵掌俄顙斷而愕眙摩衣下席蹈足掀臂將欲致詰領畫天地久之而乃謂先生曰伊潮之源先賢未言枚乘循涯而止記其極木華指近而未考其根焉有末學後塵遽荒唐而敢論先生矍然而疑乃因其後推車捧席執牯伺顏言之

少間請見徵之所如客乃曰人所不知而不言不謂之
訥人所未識而不道不謂之愚彼亦何敢擅談天之美
幹究地之輸指溢漭之難悟欲盡聽於羣儒今將盡索
乎彼潮之至理何得與日月而相符且大章所步東西
有極容成叩玄陰陽已測陽秀受乎江政玄冥佐乎水
德莫不窮海運稽日域及周公之為政也則土圭致晷
周髀作則裨竈窮情乎天象子雲贊數於幽默張衡考
動以鑄儀淳風述時而建式彼皆凝神於經緯之間極

思乎圓方之壺胡不立一辭於茲潮以明乎繫日之根本也先生苟奇之胡不思之先生將寶之胡不考之苟由日升當若準若繩何春夏差小而秋冬勃興其逾朔也當少進何遽激而斗增其過望也當少退何積日而馮陵晝何常微夜何常大何錢塘洶然以獨起殊百川之進退何仲秋忽爾而自興異三時之霧霈日之赫焉猶火之烈火至水中其威乃絕入洪溟以深漬何日光而不滅潮之往來既云因日日唯一沈潮何再出萬流

之多匪江匪河發自畎澮往成天波終古不極盍沈四
國何成彼潮而小大一式為潮之外水歸何域又云水
實浮地在海之心日潛其下而逢彼太陰且其土厚石
重山峻川深投塊置水靡有不沈豈同其芥葉而泛以
蹄涔繫塊坻之至大何水力之能任吾聞之天地噫氣
有吸有呼晝夜成候潮乃不踰豈由日月之所運作誇
誕以相誣者哉先生閱賦之初深通厥旨及聞客論訢
然啓齒於是謂客徐坐善聽厥辭蓋聞南越無頌冰之

禮鄭人有市璞之嗤常桎梏於獨見終沈溺於羣疑既
別白而不悟爰提耳而告之然事有至理無爭無勝猶
權衡之在懸審錙銖而必應稽海潮之與旨諒余心之
足證當為子窮幽而洞冥豈止於揆物而稱哉夫日北
而燠陽生於復離南斗而景長邇中都而夜促當是時
也氣蒸川源潤歸草木既作雲而洩雨乃襄陵而溢谷
魚龍發坼於胎卵鳥獸含滋於孕育且水生之數一而
得土之數六不測者雖能作於溟渤苟窮之當無羨於

升掬其散也為萬物之腴其聚也歸四海之腹歸則視之而有餘散則察之而不足春夏當氣散之時故潮差而小也及其日南而涼陰生於姤退東井而延夕遠神州而減晝當是時也草木辭榮風霜入候水泉閉而上涸滋液歸而下湊瘁萬物以如燁運大澤而若漏縮於此者盈於彼信吾理之非謬秋冬當氣聚之時故潮差而大也兩曜之形大小唯敵既當朔以制威陽雖盛而難迫其離若爭其合如擊始交綏而並闢終摩壘而先

釋日沮其雄水凝其液既冒威於一朝信蓄怒乎再夕
且潮之所恃者月所畏者日月違日以漸遙水畏威而
乃溢亦猶羣后納職來造王門獲命以出望宁而奔引
百察而盡退何一跡之敢存此潮象之所以逾朔二日
而斗增也黃道所導遐邇已均肆極陽而不礙故積水
而皆振自朔而退退為順式自望而進進為干德伊坎
精之既全將就晦而見逼勢由望而積壯故信宿而乃
極此潮之所以後望二日而方盛也自曉至昏潮終復

始陽光一潛水復迸起復來中州逾八萬里其勢涵澹
無物能弭分晝於戌作夜於子子之前日下而陰滋子
之後日上而陽隨滋於陰者故鑠之於水而不能甚振
隨於陽者故迫之為潮而莫肯少衰此潮所以夜大而
晝稍微也嘗信彼東遊亦聞其揆賦之者究物理盡人
謀水無遠而不識地無大而不搜觀古者立名而可驗
何天之造物而難籌且浙者折也蓋取其潮出海屈折
而倒流也夫其地形也則右蟠吳而大江覃其腹左挾

越而巨澤灌其喉獨茲水也夾羣山而遠入射一帶而
中投夫潮以平來百川皆就浙入既深激而為闕此一
覽而可知又何索於詳究羣陰既歸水與天違當宵分
之際避至烈之輝因圓光之既對引大海以羣飛夫秋
之中而陰盛亦猶春之半而陽肥事苟稽於已著理必
辨於猶微故濤生八月之望者尤岌岌而巍巍也萬物
之中分日之熱叩琢鑽研其火乃烈吹烟得燄傳薪就
熱附於堅則難銷焚於槁則易絕所依無定遇水乃滅

太陽之精火非其匹至威無敵至精無質入四海而水不敢濡照八紘而物莫能屈就之者咸得其光輝仰之者不知其何物其體若是豈比夫寒灰死炭遇濕而同漂泊哉方輿之下陽祖所迴歷亥子而右盛逾丑寅而左來右激之遠兮遠為朝左激之遠兮遠為夕既因月而大小成亦隨時而前後隔此日之所以一沈而潮之所以兩折也天地一氣也陰陽一致也其虛其盈隨日之經界寒暑之二道將無差於萬齡故小大可法而乾

坤永寧也若夫雲者雨者風者霧者為雪為霜者為雹
為露者雷之所鼓者龍之所赴者羣生之所賦者萬物
之所附者彼皆與日而推移所以就其衰而成其茂也
然後九圍無餘而萬流為之長輔談未竟客又勦而言
曰若乃寒暑定而風雨均也吾聞之洪範云豫常燠急
常寒狂乃陰雨為沴僭則陽氣來干苟日月之躔一定
又何遠於王政之大端彼有後問姑紓前言夫三才者
其德之必同天以陽為主地以陰為宗參二儀之道在

一人之躬一人行之三才皆協德順時則雨霽均行逾
常則凶荒接僭慢所以犯陽德也故曝尫莫之哀狂急
所以犯陰德也故離畢為之災此則為政之所致非可
以常度而剝裁也客曰唯其餘如何復從而解之曰惟
坤與乾余常究焉清者浮於上濁者積於淵濁以載物
為德清以不極為玄載物者以積鹵負其大不極者以
上規奠其圓故知鹵不積則其地不能載玄不運則其
氣無以宣夫如是山嶽雖大地載之而不知其重華夷

雖廣鹵承之而不知其然也氣之輕者其升乃高故積
雲如嶽不駐鴻毛輕而清也而物莫能勞及其干霄勢
窮霏然下墜隨坳壑而虛受任眈澮之疏潰著則重也
故舟楫可以浮寄至夫離九天堙九地作重陰之膠固
自堅冰以馴致固可以乘鴻溟以自安受萬有而不圯
者也聽茲言較茲道定一陽之所宗何衆理之難考且
合昏知暮而翰音司晨安有懷五常之美預率土之濱
苟無諒乎此旨亦何足齒於吾人子以天地之中元氣

噫噦為夕為朝且登且沒泛辭波而甚雄處童蒙而未
發孰觀地喙乎深泉之涯孰指天吭乎巨海之窟既無
究於茲源寧有因其呼吸而騰勃者哉客謝曰辭既已
矣欲入壺奧願申一問先生幸以所聞教之嘗居海裔
觀潮之勢或久往而方來或合沓而相際曷舛互之若
斯今幸指乎所制先生撰屨旁眇亦窮其變吾因訊夫
墨客當大索其所見彼亦告於余曰日往月來氣迴天
轉其激也大則體甚而相疎其作也小則勢接而相踐

惟體勢之可準故合沓而有羨其何怪焉客乃跼軀斂
色交袂而辭彼圓玄方蹟古惑今疑歎載籍之不具恨
象數之尚遺方盡迷於閭域非先生親得於學者而孰
肯論之於是乎若卯判雛生鼓擊聲隨雷電至而幽蟄
起蛟龍升而雲雨滋形開夢去醒至醒離既手之舞之
足之蹈之乃避席而稱詩為賀演知玄先生之辭辭曰
噫哉古人迷潮源兮刊編鑿翰曾未言兮羅虛列怪無
藩垣兮名儒幽討理可尊兮高駕日域窺天門兮潮疑

一釋永立言兮若和與扁祛吾悒兮昔之論者何其繁
兮意摩心揣祇為謹兮陰陽數定水長存兮進退與日
遊混元兮一升一降兮寒暑成下凝濁兮上浮清隨盈
任縮兮浮四溟釜鑪蒸爨兮擬厥形願揚此辭兮顯為
經高誇百氏兮貽億齡先生曰彼能賦之子能演之非
文鋒之破鎬何以解乎羣疑客乃酣然自得油然而退
也

海水不揚波賦

以平上去入
倒用為韻

唐

石岑

太極立天地疏嶽瀆所以鎮四維橫九服伊海之為德
有王之法象故量納羣川而道適百谷功配乾絡運迴
坤軸氣蒸混於灝元潮動襄乎山陸示懲惡則鼓怒見
夫羣怪將瑞聖則不波介以景福唐興百三十有四載
湛恩溢乎荒外倬五聖之在天奄六合而成大赫吾君
之光贊敷至道而允泰政符純德昭千古而惟新澤體
上仁同萬類而咸賴八狄窮陬而盡歡九夷無遠而不
會則成周之德未足雙越裳之來今至再是以四海盡

鏡九瀛涵影寫合璧之祥光湛連珠之瑞景德侔上善
洗物而容潔道本玄元澄心而體靜湛兮恒清晏兮砥
平汨乎無情蕩乎難名如君之道酌焉而不竭象君之
德注焉而不盈所謂皇得一則政能貞海得一則波不
驚恍兮忽兮其中有物杳兮冥兮其中有精精固奇而
不育物無大而不成鯤將化鵬欲征蚌且剖珠其明誰
能一借扶搖便為君御之貢王城

溟海波恬賦

明
屠隆

西嶽山人遊於東海遭東海生於海濱西嶽山人揖東
海生而進曰僕西嶽山人也世居西嶽華山中今者汗
漫遊於東海敢問東海之勝奚若東海生曰夫東海天
下巨麗之觀也今者子從華山西來大海之勝吾且與
子共覽焉又焉事僕空侈談其盛哉乃相與登海門縱
目觀之偉哉大浸恢詭特異氣蒸宇宙流濕雲翳簸弄
寥廓萬形失麗合渾沌并元氣蕩八荒吞四裔潏潏浩
淼超忽不知其窮際爾乃踟躕旁皇於其上海風蓬蓬

而蕭颼高天下垂大地欲浮長波卷雪跳沫崩丘肆遐
矚於空曠顛倒恍忽宵然喪其赤縣神州雄怪駭爾心
目神光散而不收西嶽山人曰有是哉東海之勝一至
此壯也東海生曰今者子徒得其大觀尚未領其奧區
也僕考之載籍東有大壑名曰歸墟受八紘九野之水
納天漢之流而廓乎有容涵乎無餘南通滇池東至瑯
邪北亘玄朔西涉流沙掩三湘吞七澤杯盂九河潢潦
四瀆大海之外又復有海禹迹之所不能到圖經之所

不能載日月跳丸於其中浮大地之幾何曾不盈其一
塊又有扶桑千仞上凌太空杳杳豁豁靈根莫窮巨鼇
載乎五山峙萬古之神功橫波乘漲不與世通唯飛仙
而能至實乃大帝之所宮蓬萊翠嶺而軒露方壺天矯
而騫驪大鳥集於壙垠之野羣仙會於虛無之場游鴻
濛遨雲將樂苑風嬉東皇盧敖偕若士而夷猶安期邀
羨門而翱翔淳圉拉陵陽而容與浮丘接王喬而尚羊
仰貫列缺之倒影上干北斗之瑤光吾將劃然長嘯矯

馬輕舉駕赤螭躡彩虹蛻塵跡訪仙蹤以凌乎海上之
諸峰子其能我從乎西嶽山人曰唯唯是或難哉子將
凌虛徑度僕恐身不能生毛羽若乘舟以往即望見仙
山輒有天風吹之而去奈何子無誕矣僕聞之聖人出
世海不揚波有諸東海生曰然即越裳氏所稱今時之
謂也今天子神聖首治改元恢唐虞之至德流大海之
波瀾化及昆蟲恩被八埏而西蜀劉公又適膺天子簡
命以節鉞來鎮東偏於鑠劉公一代偉人坐鎮方面雄

視海門千艘霧列萬竈雲屯威令霜肅德煦春溫大海
以東兀然重關巨鎮不啻一虎踞而龍蹲也方今上之
未御寰宇而劉公之未秉節鉞於東土也當其時島夷
跳梁弄兵海上鯨鯢吹腥蛟鱷鼓浪洪波鼎沸飄忽震
蕩掠我編戶虔劉元元壯者浮馘老弱見殘積骸如丘
流血成川羽書交馳偵騎絡繹將士枕戈天子旰食固
嘗徵發荆楚之劒士召募三河之巨猾廣收秦隴之勇
悍結納燕趙之豪傑莫不臨陳怖栗不戰自摧虜人屠

之如芟草萊賊用猖獗疾於風雷浙河以東江淮以南
賊衆橫行蹂為戎馬之墟城邑蕭條人民逃遁天子震
怒大吏伏誅秉鉞相繼董而翦鉏今者劉公之來軍聲
大揚不怒而威不戰而彊窮寇褫魄遠竄遐荒公志弗
懈愈嚴邊防爾乃伐鼓撞鐘建羽揚旂叱咤則噴薄山
岳指顧則旋轉滄溟截水怪驅蜃精奔巨鯢走長鯨伏
罔象之神姦褫支祁之猙獰陽侯頓戟其惡風靈胥不
鼓其狂波琴高伏日月之光景海童吸陰陽之靈和奇

相助順於沙汭岷精呈曜於巖阿駢馬遯跡於重泉水
兕潛形於盤渦龍鯉一角而馴擾天吳九首而婆娑沈
遊神蜃屏息靈鼉文魴精麗其錯綺玄螭光生乎纖羅
樓臺結乎蜃氣光芒發於若華百靈栖息萬怪不譁瑞
藹蔥蒨珍奇孕出玃璣璀璨絢霞映日水晶獻於馮夷
之宮冰綃貢於鮫人之室明珠來於驪龍之淵大貝出
於鼃鼉之窟瑤玉見於析木之津玫瑰效於金樞之穴
鳴石叩而有聲浮磬塵而不汨又有文鷁窈窕奇鷁連

娟白鵠踉蹌玄鶴蹁躚爰居之栖島嶼屬玉之下藍田
大鵬之翮垂雲駿鷁之光竟天是皆珍怪瑰權奇鬼
化詫希世之瑞而壯靈海之觀又如颶風不作海若大
喜平波展鏡深不見底天朗氣清廓落萬里曜靈出於
暘谷朝暉射乎扶桑乘騎鬱而縹緲沆瀣浮而蒼茫六
合清塵王風四張百粵底定物無災傷配美周京海波
不揚若乃島夷卉服窮髮荒陬新羅高麗朝鮮琉球烏
衣黑齒穿心飛頭海外之國類千百許雕題文身獸形

鳥語天界夷夏隔絕中土莫不梯山航海間闕長征重
譯款塞來朝聖明獻琛質子頓首闕庭妖氛滌蕩寰宇
澄清海無驚波東方以寧於是玉帳晝閒高牙夜寂鳴
笳不動刁斗不擊元戎坐笑圍碁對客椎牛饗士超距
投石戰卒解甲健兒橐弓水犀三千貔貅萬營艤艫巨
艦舳艫艨艟錦帆綵幔青雀黃龍莫不維纜海濱橫槊
相連高歌鼓吹擊榜叩舷三軍驩謔誼亘徹天或觀濤
於浦口或弄潮於急湍或試射錢塘之強弩或戲擲驅

石之長鞭漁者垂簷何之綸投任公之釣搜滌洄之流
窮幽眇之島總江豚羅海狶取鮪鱮索王鱣帆檣相戛
和歌擊鮮而或引吞舟之巨鱗連橫海之楫尾鬣鬣插
雲顱骨積壘流膏吐涎腥聞千里獵者張機設網列滿
坑谷弋射海獸奔駭馳逐獲狡兔縛鉅鹿麟玄猿麇獐
獲納骨專車割鮮殷轂至若海上編氓居鄰斥鹵煮海
為鹽沃饒萬戶經營太公料理仲父筴籍勾稽大國以
富或採海錯往來隨潮水母目鰕屋瓦互珧石華海月

螺蚌鰓金齏玉膾人競肥膏又若海舶大貿易貨島
外挂席海水馮陵澎湃出沒魚龍經涉神怪關吏不詰
津卒自在齊民之環海而居者樂化日之普照沐聖澤
之無涯魚鹽雜運烟火萬家秋熟稷稻春榮桑麻黃稚
鼓腹而喜遊俠少蹴躅而紛拏吳歊越唱激楚渝巴撾
鼓吹笙管絃嘔啞歌士遊女聯袂滿車遺簪墮珥履舄
交加矜珠玉之滿盛關羅綺之繁華斯皆聖天子之宣
鉅化敷偉功運真宰參玄穹仁覆京邑旁流四封而實

劉公之有大造於東也是以朝廷釋東顧之憂大臣不復建靖海之策天子舉萬壽之觴於上詞臣撰太平之頌於側高居穆清海天寧謐又奚必如漢武泛蓬萊之樓船秦皇侈會稽之勒石皇圖永固其樂無極僕將與子偃卧海濱覽其巨麗收其閑放以天子之胸臆於是西嶽山人瞿然而驚爽然而喜起謝曰僕居華下日常登嶢巖履崔巍以為天下之大觀自華止矣今者觀於海復聽子談東海之勝迺令僕自失邪莊生河伯海若

之喻詎不信哉

海重潤賦

唐梁洽

道之應物兮小大咸信物之感道兮禎祥必順況我儲君元膺在震乾乾夕惕兢兢日慎德澤潤於生靈滄海得無重潤惟海之量百川朝宗猶君之美萬國向風朝宗者歸其廣向風者欽其政既同類以相求故重潤而必應是使日光分色山輝度映風雨不淫魚龍遂性羣眎仰止是燔瘞以告成外國聞焉願梯航而來聘然則

我君之明兩也景毓前星休徵夢月主鬯之功昭著牽
衣之智逸發四皓既親三朝不闕故曰惟其有之是以
似之海則靈潮晨夜而無替君惟順動溫清而有時詳
夫海之為器也吞吸八裔流不逆細怪必思蓄珍無不
麗冲融澹汨膠輻彭潏飛濤疊躍於秋陰白浪翻光於
春霽雖則沙石混濁不蕩其清波瀾迅委終復於平惟
此之故彰我君明至矣哉靈海之潤孰知其極願乘桴
以攸往非引蠡而能測道未行兮竊喜取材敢獻賦兮

楊君之德

海市賦

明黃卿

猗巨壑之連大荒兮何浩淼之無垠
浸盤藍之澹泞兮兩曜晃其吐吞
西極以東之流瀉兮總漚溶而不靈
維五行之贊二儀兮水邃廣而獨神
指三山十洲之宮府兮聿杳邈而難
論春海市之譎變漂疾兮駭靈異於
見聞彼喬嶽之雲霧兮氣氤蒸之可
知若潮汐與八月之濤兮亦實理之
所為何洪波之決漭兮恍忽出示之
瑰

奇髣髴世之形質兮頃刻更移其態姿寒晦斂而宜和
朗兮計歲見之無幾詢海叟之博練兮槩罔究其兆倪
陟蓬萊之峻閣兮出海隈之崇岡盱雲霓之乍斂兮泛
霽日之浮光渺萬頃之潏潏兮胸襟豁以徜徉人走報
以市起兮僕御奔而踉蹌兩竹山之夢夢兮牽牛島失
其青蒼肇蓊鬱於尋尺兮旋騰翬以悠揚少徙倚於巖
阿兮已宛在水之中央卧青霓之空明兮如潼潼於沸
湯簇碧霞於一區兮浮晻靄而迴翔譬畫苑之會衆藝

兮懸繪品之千章天吳羣下而蛟螭兮亟為築厥厚墉
閭象十輩而出捧兮躍蜒蜒而爭能爰居潛鵠翻翻兮
如助勢而唳鳴爾乃開五都之闐闐兮集日中之市廛
南北萃貨之雜陳兮海賈陸商之爭先立候殆工匠之
售技兮佻佻類駟僮之輕獩販鬻之繽紛兮緊接踵而
摩肩言不聞而有營兮覩巾服之粲然綖獲貿易以散
返兮行負戴以偃僂伊機巧之戲劇兮爭聚觀之如堵
負耜耒而荷畚鍤兮走農豎與田父一二弁屨之若遠

兮意何居而踽踽山冥冥以遠隔兮巨介避之何所俄
而金榜之日耀兮列甲第之逶迤崇朝層樓之翼翼兮
雕甍朱拱之翬飛亭臺微突其尖兮重簷密瓦之參差
雉堞嚴城之洞啓兮藻績黼黻之歲黹寶塔矗矗凌霄
兮華表踞立乎虎獅余儼長楊五柞之麗兮客謂未比
其光儀忽建纛幢之孑孑兮散旒旃之旖旎棨戟干戚
崢嶸兮躍騶騎之蹻駛安輿飛蓋之徐徐兮檐帷流蘇
之鮮袞從官健卒駢駢兮郊迎野將之迤邐憶名城之

孔道兮輪蹄輻輳之如是爾其酒旆颺颺兮芳菲近郊
遨遊絡繹兮飛虹之橋王孫俠客兮鷹狗靚妝妓服兮
笙簫竹娟娟兮俯垣茂樹交兮徑遙熒熒兮日下射翳
翳兮風不飄欣欲就兮水之隔招名筆兮臨之圖有懷
華胥兮風景爾殊空中波上兮靡監璘璘爛漫兮易佞
澤沸兮奔電息潢漾兮涵杳虛如錦棚之迅撤兮傀儡
紛散於須臾望島嶼之隱隱兮招玄鶴之翩翩顧偕遊
之大小兮漸從容以言旋謂老鮫之播怪兮何鯨鯢巨

而不然殆海若之幻戲兮較浮世之絢妍嗤方士之陋
以誕兮誘秦漢之求仙侈金銀之宮闕兮或緣此而譌
謾嗟么麼兮貴倖若赫橫兮威權燎燄兮易燼綺繡兮
露乾百爾翕散消息兮咸有極而無端寥廓忽荒如夢
兮嘉曠士之達觀奚詰辨之倣雕龍兮謾贅費於幽玄

海月賦

明謝杰

緊波臣之徠服矢寶目於明庭敷輅楷之遺則激皇王
之濯靈帝嘉聲敬之被訖鑒孤遐之款誠爰命二臣以

于邁泛餘艖而東征余乃棄孥息辭弟兄耦星使趨王
程出晉安道新寧駕飛廉馮大庭望洲島涉裨瀛翩然
霞舉冷如風行比中流以遙矚值華月之方升瞻彼月
兮太陰之精潮應而落潮應而興潮侵而闕潮盛而盈
既與潮而為伍自與海而相仍此善下而大彼虛受而
凝此浮天而為岬彼借日而生明此納百谷而稱王彼
從衆星而名卿滄桑以為晝夜晦朔以為死生被窮髮
而黑經閭浮而青三蛟肥而滿六鼈奠而寧魚腦滅而

減龍伯戲而傾既漚漚而湔湔亦淵淵而泠泠爰瀄瀄
而曠曠復鼎鼎而熒熒倏忽異狀瞬息殊形方夫崦嵫
既沒扶桑未啓光風乍融太宇轉霽下無驚濤上無微
翳望舒狩而升輿羿妻奔而騁轡織阿驂乘結鄰翼衛
重輪稅於歸墟合璧騰於蒙汜黃道經於碧津赤路交
乎黑齒滄嶼養魄沃焦抱珥員嶠奉規尾閭循緯碣石
薄而鳬飛之界蕩而兔逝天墟浹而螢長析木浮而桂
墜玉珧石華潛盜其靈海鏡方諸亦稟其氣非眇非胸

非匿非肫時五而三時八而二增潤重溟流輝萬里洗
光金銀之宮湛碧珊瑚之址或縐者如穀或爛者如綺
或潔者如圭或平者如砥或好者如瑗或激者如矢或
華者如蜃或躍者如鯉或如素鳳之下池頭或如白鴈
之嬉水次或如瑤瑟之鼓湘江或如鮫綃之絢蓬市或
如寶筏度於恒河或如玉華點乎蒼珥或如螢火映於
林塘或如梅花落夫沼沚或浮或沉赤烏浴而淵暉或
滅或沒驪龍頷而川媚或閃或爍電騰雲漢之墟或錯

或落斗轉明河之涘想而像之驚心駭視至如皓靈披
素爰瀾生紫儼若軒帝遺珠赤水迴雪宛轉清麗射人
又若宓神歸於洛濱夜光盈盈蟾蜍在腹又若女狄暮
汲而育銀山雪屋千疊萬行又若伍相立馬錢塘陽侯
疾驅金蚪狂舞又若澹臺碎壁水許須臾浪息微明不
波又若武皇眺於影娥暘素繽紛非練非組又若天孫
夜渡河渚靈暉煜煜萬濤增妍又若神劒沈於鐔淵茲
時茲景洵不易得水鏡空明冰壺津液玉杵秋清玄霜


夜碧漢皐風迴環珮淅瀝陽臺雨歇朝雲生白以泳以
游其樂何極於是舉酒以屬諫議分韻賦詩余歌曰月
出兮東方水流兮湯湯我所思兮道路長欲往從之兮
河無梁諫議亦歌曰月暈兮知天雨海水兮知天寒佳
期逝兮衆芳闌思美人兮隔雲端歌竟魚龍交奮餘景
就畢滿船跼伏不寒而栗余獨怡然載賡載繹秋水之
篇明月之什一閱未終颺舉兩腋流響溯澗排山破石
馮夷遭迴天吳辟易少焉風定雲色猶黑諫議曰美哉


色也洋洋奕奕宜諧宮商服之無斃眎彼乘興南樓賦
詩赤壁牛渚泛舟晉陽卻敵洵夷險之殊致又遐邇之
迴跡奚啻大明之與燭火海若之與河伯

御定歷代賦彙卷二十四

謹案第一頁前八行騰波赴勢刊本波訛傾據文
選改







總校官庶吉士臣張能照
校對官編修臣馬啓泰
謄錄監生臣夏清和

財團法人
佛陀教育基金會
釋淨空 敬

